

善本書室藏書志

善本書室藏書志卷三十五

錢塘丁丙松生甫輯

集部十四

御製文集四集三十卷 明初刊本

明太祖撰甲集文二卷乙集文三卷丙集文十四卷詩一卷丁集文十卷前有制語一篇是晚年作也版寬刻湛紙潔印精此與千頃堂書目所載四部之第一部國史經籍志所載之第二部卷數相符卽四庫提要所謂三十卷今未見傳本者是也
高皇帝御製文集二十卷 明萬曆刊本

卷一二詔卷三制誥卷四誥卷五書卷六至卷八敕卷九敕命
卷十策問敕問論卷十一樂章卷十二樂歌卷十三文卷十四
碑記卷十五序說卷十六雜著卷十七卷十八祭文卷十九古
詩歌行卷二十五言律詩五言排律七言律詩五言絕句七言

絕句末載萬歷十年臣姚士觀謹識云右御製文集二十卷我太祖高皇帝萬幾之暇躬灑翰墨而筆之汗青者當是時操觚之士如劉基宋濂陶安王禕諸君雲集闕下而詔誥表敕以泊祀奠樂章咸御筆親裁之卽諸臣非無作者皆莫之能及也是集襲刻之雜揚迺中都爲聖祖龍興之邦翳獨缺焉偶於年友沈鈇氏獲舊本持歸署中是用侍史染翰刷人供役冀與都人士共焉仍列洪武七年十二月甲寅臣劉基謹序於後此卽四庫著錄之本也

宋學士先生文集二十六卷

天順刊本

孫淵如藏書

明宋濂撰濂字景濂號潛溪浦江人元順帝時以薦授翰林編修入明官至翰林學士承旨兼太子贊善以孫慎獲罪安置茂州卒事蹟具明史本傳濂學古文於吳萊後又受業於柳文肅黃文獻所爲文明史稱其醇深演迤與古作者並其集元時所

刻者已有潛溪前後續別四集明洪武間又刻潛溪新集楊維禎揭泂爲序其後在翰苑所作曰翰苑集歸田所作曰芝田集各四十卷見鄭楷所爲行狀又合潛溪龍門諸集總爲一百三十卷見吳之器婺州書今諸刻皆亡矣近日鏡尙張湑所刻八編本據稱得景濂次子璉繕寫墨迹遂以鈐木正德以前未之有也此書爲天順間浙藩左參政莆田黃譽合潛溪前後續三集及文粹等書選擇分類得文六百餘首刊於浙中其鑒別頗能持擇景濂喜爲二氏撰述文字嚴榮刻本所載極多實爲全集之累此刻刪削淨盡讀之心目爲之一清前有魏驥序此書嘉靖三年有翻刻本有附錄二卷遠遜此本之精雅卷首有伯淵朱文方印

潛溪先生集十八卷

天順蜀刻本

黃堯圃藏書

後學弋陽黃溥澄濟選編古相羅綺尙綱校正

明宋濂撰前列宸翰一卷併金華王禕序後有附錄一卷天順元年四川提刑按察司按察使黃溥題跋黃丕烈識云此天順刻本潛溪先生集爲弋陽吾家澄濟氏所選定者各家書目俱不載唯千頃堂書目及家俞邵明史藝文志有之雖係選本實舊刻也頃往常熟同年友張子和家弔其母喪因於書肆搜得歸再展玩首至末悉排長葉亦刻書之一格并著之以識古類至是集亦爲潛溪先生諸集之一本藏書家何可輕棄耶有黃丕烈印汪士鐘讀過潘氏桐西書屋印某坡潘介繁珍藏諸印宋學士文集八編總七十五卷

明正德刊本

西泠草堂藏書

明宋濂撰凡鑒坡集十卷鑾坡後集十卷翰苑續集十卷翰苑別集十卷芝園前集十卷芝園後集十卷芝園續集十卷朝京稿五卷俱大題在上小題在下前有洪武庚戌會稽楊維禎前苑集序又豫章揭汝序又清江貝瓊序後爲正德九年太原張

潛重刊後序云初太史公手定八編凡若干首以細眼方格命子燧繕錄精整首簡猶公手筆其本亦歸鄭氏久之流入錢塘予購得之愛重藏襲行輒與俱因爲鈐刊有西泠草堂陳仲遵印二印

重刊朱淵學士先生文集二十六卷附錄二卷

嘉靖刊本 怡耶藏

此書卽重刻天順間黃譽刻本前有蕭山魏驥序序後有嘉靖三年春月安至堂新刊行一條多附錄二卷有明善堂珍藏書畫印記嘉慶庚午金華嚴太守榮刊文憲集彙張刻徐刻周刻陳刻傳刻彭刻諸本備校而獨遺此本則無論原刻重刻傳印之稀已可見矣

潛溪集八卷

嘉靖刊本 汪魚亭藏書

金華宋濂著

前有莆田陳旅烏傷王禕廬陵歐陽元三序及東陽胡助撰宋

氏世譜記鄭澍撰潛溪先生小傳蘭谿徐元青田苗睿曾稽屠
性浦江戴良蘭谿趙良恭浦江鄭澍蘭谿吳沈金華許元烏傷
王禕撰畫像贊附錄柳待制黃侍講陳徵君胡博士吳山長五
書後有至正十六年門人浦陽鄭煥識語嘉靖間徐中望氏嵩
重刊西蜀高節爲跋有篁菴氏印汪魚亭藏閱書印篁菴豈卽
全謝山耶按潛溪入明之作劉誠意選定爲文粹十卷門人方
孝孺鄭濟等又選續文粹十卷皆孝孺與同門劉剛林靜樓璉
手自繕寫刊於義門書塾革除之後多爲禁絕今兵燹之後更
無從得矣

誠意伯劉公文集二十卷

臨慶刊本

汪魚亭藏書

明劉基撰基字伯溫青田人舉進士授高安縣丞入明官至宏
文節學士封誠意伯正德九年賜諡文成事蹟具明史本傳基
文宏深肅括亞於潛溪詩亦沈鬱頓挫一洗元末纖穠之習所

著有蚓迹錄一卷覆瓿集十四卷郁離子四卷寫情集二卷
眉公集二卷春秋明經二卷刻於永樂初年翰林學士王景爲
序嘉靖丙辰縉雲樊獻科合諸集重編爲十八卷刻於真定卷
首列像贊行狀碑記此隆慶六年陳烈重刻樊本前有烈自序
及何鍾序文成遺著永樂分編之本今不可見矣卽真定刻本
藏書家亦未見箸錄則讀劉集者此爲最古矣卷首鈐有汪魚
亭藏閱書朱文方印

鳳池吟稿十卷

精鈔本

明汪廣洋撰

廣洋字朝宗高郵人少從余青陽關學善篆隸工詩歌元末舉
進士寓太平明太祖渡江召爲元帥府令史出參軍事參政行
省入爲中書左丞封忠勤伯拜右丞相貶廣南行至太平賜死
蓋爲楊憲胡惟庸所牽連也宋景濂序其詩以爲絕人之資博

極羣籍從征伐則震盪超越在廊廟則莊雅尊敬王元美評其詩如胡琴羌管雖非太常樂琅琅有致朱錫鬯云忠勤詩饒清剛之氣一洗元人纖縟之態五言詩靜居北郭猶當遜之毋論孟載也

陶學士文集二十卷

宏治刊本

李申耆藏書

鉛山張祐校編

明陶安撰安字主敬當塗人至正初中江浙鄉試授明道書院山長明太祖渡江首率父老奉迎敷陳大業力贊攻取留置幕府歷左司郎中出知黃州降桐城令移知饒州仍改知黃州國初置翰林院首召爲學士御製門帖賜之曰國朝謀畧無雙士翰苑文章第一家洪武元年擢江西行中書省參知政事卒於官安之文名亞於宋景濂然學術深醇詞皆平正典實所著郊社宗廟典禮奏議及刑律諸牘皆不列入氣象固是不同宏治

十二年鉛山費宏序云安集甚富在元有辭達類鈔在中書有知新近稿赴武昌有江行雜詠守黃州有黃岡寓稿在桐城有鶴沙小紀總若干卷刻置太平郡齋郡守徐時中項誠之所刊當塗學諭張祐校其譌次其類是總廿卷者爲祐所編次也并爲後跋前刻學士事蹟一卷有養一李兆洛印申耆白事諸印西隱文稿十卷

萬曆刊本

滑臺後學王崇之編次東萊後學劉師魯校刊

明宋訥撰訥字仲微滑縣人元末進士授鹽山知縣洪武十三年徵國子監助教擢翰林學士文淵閣大學士遷祭酒卒正德中追謚文恪西隱集本十七卷而明史藝文志千頃堂書目所載均與此合萬厯戊寅知滑縣事劉師魯序云公集蓋上海張趨教滑時所手錄而滑先達王崇之令上海從其後得之請大名推官吳興顧爾行序之按祭酒師道尊嚴爲一代典型詩文

渾健古雅同輩推之而過元宮諸作悲涼酸楚雖庾信江南之
賦無以過之若華表柱頭相語鶴秣陵江上獨歸鴻縛蘆密覆
低低屋抱竹輕撐小小船野航招客買蓮子沙鳥驚人入荻花
夕陽野飯烹魚釜秋水蒲帆賣蟹船斷壁野花迎客權壞牆津
柳曉魚魯又未嘗不風神獨絕也

王忠文公文集二十四卷附繼志齋稿二卷贖齋稿一卷齊山稿一
卷萬歷刊本 星清于氏藏書

鄱陽三臺劉傑編廬陵銅溪劉同校溫陵子環張維樞重選

明王禕撰禕字子允義烏人少與宋景濂同出柳待制賈黃侍
講潛之門學有淵源元季觀時政衰敝走燕都上書不報歸隱
青巖山中明太祖徵爲中書省錄事進平江西頌詔修元史與
宋濂同爲總裁書成拜翰林待制奉使招吐番至蘭州召還改
使雲南抗節死年五十有二建文元年贈翰林學士謚文節正

統中改謚忠文子紳孫祿皆以文學世其家禕文酷樸而宏肆
具北宋之遺景濂稱其體凡三變可謂深知甘苦初著華川前
集十卷胡翰胡行簡爲序又著華川後集十卷宋濂蘇伯衡爲
序正統五年義烏丞劉傑旣請於朝易謚復合輯其集而乞楊
文貞士奇爲之序首列洪武三年正統六年誥敕此本乃萬厯
甲辰溫陵張惟樞重鐫自爲序爲傳並刻吳寬撰祠記李默撰
祠墓記而附其子國子博士王紳繼志齋文稿二卷王祿續齋
詩稿王汝齊山文稿各一卷有星渚于元仲珍藏書籍九葉傳
經一經傳舊業子子孫孫引無極諸印

翠屏集四卷

宣德刊本

門人國子博士淮南石光霽編次

明張以甯撰以甯字志道先世固始人宋南渡徙閩之古田家
翠屏山下因號翠屏山人登泰定丁卯進士厯官郡邑世亂畱

滯江淮至正中官翰林學士承旨尋拜祭酒入明復爲侍講學士三使安南以卒實洪武三年也詩則門人石光霽先爲編刊綴有小跋文則其子孟晦彙次有宋濂劉三五陳南賓等序石光霽跋宣德三年諸孫南雄教官隆復更以安南彙續刊羊城陳璉爲後序此爲宣德間刊本

王常宗集四卷補遺一卷

宏治刊本

明王彝撰彝字常宗其先蜀人本姓陳父在元官崑山教諭遂遷嘉定自號媿雌子洪武初以布衣召修元史史成賜金帛遣還又薦入翰林以母老乞歸後以魏觀蘇州府治上梁文事與高啟同伏法彝少孤貧讀書天台中師事孟長文得金文安之傳其學遠有端緒所作蘇州孔子廟學碑南門記鄉飲酒碑銘文甚高潔不僅以文妖一篇詆楊廉夫爲錚錚矣詩如斜陽欲雨未雨別嶺歸人幾人峯凹忽見月出獬子相迎澗濱頗有

摩詰遺韻又題宋徽宗畫百合圖云偶爲美名圖百合不知南北已瓜分亦有思致舊有三近齋稿久佚此本宏治十五年吳郡都穆繕爲四卷劉子珍世居嘉定刻梓以傳附補遺穆有序同邑浦果劉廷璋並有後序

蒲菴集六卷

正統刊本

門人曇鑑法住編次

釋來復見心撰前有廬陵歐陽元序云翰林修撰張翥索示豫章見心復公所爲文一巨帙且屬爲序靜閱數過啟沃老懷見心以敏悟之資超卓之才於禪學之暇發於文辭其敘事簡而明其造理深而奧其吐辭博而瞻其寓意幽而婉云云又洪武十二年金華宋濂序云見心之作濃麗而演迤整暇而森嚴實諸古人篇章中幾不可辨公卿大夫交譽其賢名聞九天特加褒美其徒曇鑑編類成書釐爲十卷來徵濂序云云後有正統

五年徽州府僧綱司都綱豫章雄山靖菴孫以甯重刻後序附
豫章雲峯幻庵法住詩一卷有煙霞道人一印按七修類稿載
元明濬字天淵胡人也世祖朝明安之後髯長數尺仕元爲學
士元亡削髮爲僧改名來復見心而髯如故太祖召至怪而問
之曰汝不欲仕我而出家爲僧吾亦任汝然去髮留鬚亦有說
乎對曰削髮無煩惱鬚表丈夫上笑而遣之後承詔賜食謝
詩有金盤蘇合來殊域及自慚無德頌陶唐等句上怒曰汝用
殊字是謂我反朱耶又言無德誦陶唐是謂朕無德雖則欲陶
唐頌我而不能耶何物奸僧輒敢大膽如此見心遂玉筋雙垂
圓寂於丹墀之下又按清教錄內刊僧徒交結胡惟庸謀反者
凡六十四人以智聰爲首宗泐來復皆智聰供出逮問者也復
見心招辭本豐城縣西王氏子祝髮行腳至天界寺除授僧錄
司大覺義欽發鳳陽府圓通院修住洪武二十四年山西太原

府捕獲胡黨僧智聰供稱胡丞相誅舉事時隨季潭長老及復見心往來胡府見心坐凌遲死年七十三似與類稿所載不合正統刊集詎見心受刑之時才五十年而以甯後序無隻字道及殆爲尊者諱耳

密庵集八卷

舊鈔本

明謝肅撰

肅字原功上虞人少與唐肅齊名稱會稽二肅宣城貢師泰嘗器重之慨然欲見淮張之秉鈞者上偃兵息民之策無所遇歸隱越中洪武十九年舉明經歷官福建按察司僉事風裁凜然坐事被逮太祖御文華殿親鞫肅大呼曰文華非拷掠之地陛下非問刑之官請下法司乃下獄獄吏以布囊壓死有密庵集十卷金氏文瑞樓猶藏其書年深漶沒館臣採自永樂大典釐爲八卷卽此本也仍錄金華戴良原序二篇於前

危太樸集四卷

吳志上鈔本

臨川危素著

素字太樸金谿人年十五通五經大義嘗受業草廬之門甚加器重元至正二年以薦入經筵爲檢討累官禮部尙書除翰林學士承旨知制誥兼修國史元亡趨投所居報恩寺井中寺僧大梓與番陽徐彥禮力挽之曰公不食祿四年矣今必死如國史何入明太祖訪以元興亡之故甚見禮重俾侍禁林宋穆陵顛骨爲楊璉眞伽所發後入宣政院番僧傳爲飲器素言於上索取瘞之聚寶山又移葬會稽後謫伽和州有文集五十卷宋元史若干卷皆失傳嘉靖間歸氏有光得其手稿皆元時所作者遂傳錄於世此本賦三贊一銘二頌三記五十有二序七十有九共一百四十篇較之王白田雜著所記數增三篇又多哀詞一詩二十首前有宋濂所撰墓碑銘有州來氏藏書記吳允

嘉印石倉手校海昌吳葵里收藏諸印

危太樸雲林集二卷附文四卷

舊鈔本

紅藥山房藏書

南陽迺賢易之編

明危素撰危居大都鍾樓街明師入燕將投報恩寺井僧挽之
得不死兵及史庫遂言於主帥輦而出之累朝實錄得無恙然
元史成日曾未獲與筆削黃文獻治所作太常博士危府君墓
志府君諱永吉字德祥徙居雲林三十六峰之陽卽素之父也
集名雲林當本乎此詩皆元時之作前有虞集送行序當是後
人所綴原詩七十六首此本八十三首似鮑廷博補遺之十四
首尚不在內當再核之後仍附文四卷有紅藥山房收藏私印
平江黃氏圖書宗櫺詠川古鹽張氏諸印

槎翁詩八卷

明萬厯刊本

秦和劉嵩子高著高安陳邦瞻德遠閱新安余懋孳舜仲訂

嵩初名楚又作崧字子高泰和人七歲能賦詩元末舉於鄉洪武二年以人才舉職方郎中遷北平按察副使坐事輸作京師十三年手救召爲禮部侍郎權吏部尙書請老十四年復召爲國子監司業卒於位明史有傳嵩家業儒苦貧兄弟三人有宅一區窮居數十年豁如也痛自督策日課一詩多至千餘篇天下大亂不爲少折遭逢貴顯淡如布衣北平元之故都去家五千里惟一僮侍側脯時吏散獨處一室據几吟咏夜分不休句鏤字琢苦具經營核其體格於唐近大厯十子於宋類永嘉四靈於元最肖薩天錫洪武五年宋景濂敘其詩十九歲以前皆焚去二十至四十九所存亦十之七八門人蕭紳所編清江劉永之四川烏斯道又爲之序目錄後有萬厯庚戌王正吉山陰王應遴董父監梓於眞如齋中木記

明劉松撰正德庚辰秋校正嘉靖紀元夏梓完泰和後學羅欽忠序云先生平生詩文萬篇詩刻于蕭氏而文則爲銘贊傳說序記諸體若干首藏於家百五十年於茲矣玉光劍氣固不容掩家兄吏侍在告家居得而校之未畢迫於召命瀕行奉以告吾吉邵太守徐侯士元畢校指刻之有安成東郭山人鄒守益後識 四庫列入存目有張紹仁印學安訥菴執經堂長洲張氏收藏諸印

丹崖集八卷附錄一卷

天順刊本

張訥菴藏書

曾稽庸肅處敬著

肅字處敬曾稽人九歲入郡庠元至正己亥中浙江鄉試授黃岡書院山長轉嘉興學正洪武以故官召修禮樂書權應奉翰林文字兼國史院編修官以疾失朝罷歸謫佃涇歲餘卒年四十有四子之潛函骨歸葬其文極爲危太樸宋景濂戴叔能申

屠子迪所許當其挈家居橋李徐幼文送以詩云路出三江外
程淹一日間高季迪詩云舟重全家去詩多一路題處敬亦有
留別詩載集中洪武八年吳郡申屠衡敘之附錄同郡翁好古
撰行狀眉山蘇伯衡撰墓誌銘及金華吳沈天台朱右潯陽張
羽睦徐尊生吳郡申屠衡渤海高啟金華宋濂同郡胡惟仁錢
塘白範里友馬弓甸乘陳韶眉山蘇伯衡像贊及弔文挽章天
順八年平湖沈琮刻於粵自識於後有吳郡張紹仁學安藏書
執經堂張氏藏書諸印

白雲稿十一卷

舊鈔本

天台朱右

右字伯賢臨海人而白題天台自號鄒陽子至正間嘗詣闕獻
河清頌不遇歸洪武三年召修元史六年修日歷除翰林院編
修七年修洪武正韻尋遷晉府右長史卒於官明史附趙璘傳

張楠渠稱其感興不在魏晉下郭公葵稱其廣琴操出人意表
非徒擬作 四庫著錄祇五卷朱彝尊嘗於內閣見有後五卷
惜未鈔成此本卷一騷賦卷二三雜著卷四五序卷六記卷七
遊雲門五記遊四明東湖諸山五記及諸記卷八銘贊卷九題
跋卷十哀誄卷十一摺留子傳附明初宋濂劉基等七人題序
序其稿者至元五年永嘉李孝光清河張天莫至正甲申臨川
危素甲午臺城倪中至正庚子上元楊嗣同郎劉仁本金華宋
濂

甘白先生張子宜詩集六卷文集六卷 十萬卷樓鈔本

明張適撰適字子宜蘇州人幼穎悟七歲能賦詩彈琴九歲能
誦五經十三應江浙鄉試人以神童目之元運將革不仕明洪
武初與高啟同徵修元史授水部郎中乞歸復朱樂圃故基居
之後復以明經薦授廣西理問歷雲南滇池魚課司大使終於

官遺稿卷一二爲樂園集卷三江館集卷四南湖集卷五江行
集卷六滇池集文亦六卷詞旨修潔頗爲雅音正統丁卯其子
收因手錄未刊屢遭回祿存者十之七八收二子長曰敬教授
鄉里次日祝以進士官大理評事始得研耕之資俸祿之餘命
長孫綱刻爲十二卷六年方成收有識時年已八十有六前有
正統六年都察院右副都御史同郡陳鑑序此爲蕭山王氏十
萬卷樓鈔本有王宗炎所見諸書印

清江只先生詩集十卷

明初刊黑口本

汪闥源藏書

明貝瓊撰瓊一名闕字廷琚崇德人年四十八始領鄉薦張士
誠據吳隱於艾山聘不就洪武三年徵修元史除國子監助教
與宋景濂友善至相推讓明史附宋訥傳姚文公憐爲承旨時
一旦玉堂宴集召妓奏曲有眞眞者操南音公疑問之泣對曰
妾建甯人西山之菑裔也父司筦庫於濟甯坐盜用官錢賣妾

流落公憫之遣使白丞相三寶奴爲落籍且以配翰林屬官王
棣棣復至翰林待制璚賦眞眞曲卽在集中學詩於楊廉夫而
獨不竝絕刻峭荒唐險怪朱彝尊推其詩爽豁類汪朝宗整麗
似劉伯溫圓秀勝林子羽清空近袁文景風華亞高季迪朗淨
過張來儀繁縟愈孫仲行足以領袖一時舊集二十卷萬厯中
所刻止三卷此本爲詩十卷前後無序跋當卽桐鄉金檀重雕
之祖本而佚其文集者有汪士鐘藏一印按文瑞樓藏書記云
先生之子翔以文學選爲楚府紀善積其祿餘刊爲此書有天
台徐一夔序

蘇平仲文集十六卷

正統刊本

振綺堂藏書

迪功郎象陰縣主簿永嘉林與直編處州府推官章貢黎諒校正
重刊

明蘇伯衡撰伯衡字平仲其先居眉山文定公長子遜知婺州

遂家焉乃爲金華人入明爲國子監學士擢國子院編修宋濂致仕稱爲文詞蔚瞻有法薦以白代召至復固辭賜文綺還歸後起教授處州以表箋忤旨下獄卒二子怡恬救父并被判士論惜之洪武四年劉基爲集序當是初稟八年胡翰爲後跋十三年宋濂又序之正統壬戌處州推官黎諒識云蘇先生詩文若干篇前蒙陰主簿林與直編類分爲十六卷鏤版郡庠年久版朽過半正統庚申予官括郡求其集不可得因公抵溫謁少保黃先生以平仲集見示惜字多昏翳謾謾乃躬自磨錄重壽諸梓卽此本也有汪魚亭藏閱書一印

蘇平仲文集十六卷

舊鈔本

迪功郎蒙陰縣主簿永嘉林與直編集

卷一雜著卷二雜著表文論冊文制誥頌贊策題卷三說傳卷四傳序卷五序卷六序記卷七八九記卷十題跋卷十一祝文

上梁文碑銘記品謚議祭文哀辭卷十二碑誌碣卷十三表
述卷十四誌壙卷十五詩賦辭古今詩卷十六空同子贊說前
有洪武四年括蒼劉基十三年宋濂序正統壬戌章貢黎諒識
後有洪武八年金華胡翰贊說跋並處州推官黎諒又識云太
史蘇先生所著詩文凡一十六卷鏤版郡庠傳久朽半別駕曹
侯尋訪舊本梓補其缺然舊存者皆翳謫謬恐誤後學不揣躬
校乃命郡人葉景森繕寫成書謀諸郡守武公揮使牛公貳守
曹公通判黃公各捐俸重梓始於壬戌二月畢工八月燦然一
新此識語前刻本已脫特補於此

胡仲子集十卷

洪武刊本

徐興公藏書

門人同郡劉剛編

明胡翰撰翰字仲申一字仲子金華人洪武初以薦命爲衢州
教授會修元史分撰英宗睿宗本紀及丞相拜住等傳史成賜

金帛遣歸少師事吳師道與吳萊復登許謙之門諸公期待者甚隆其後學益成行益修德愈邵而文愈雄雖未展其用滄如也隱居長山之陽暮年無子卒於洪武辛酉年七十五學子劉剛編次其集浦江義門王懋觀刻之各有識語而同郡宋濂爲之序歎先生之善學古人而幸天下之見其文也文凡九卷詩一卷洪武十四年版行提要謂其印本罕傳惟寫本猶存於世此則洪武刻本也有晉安徐興公家藏書慕齋鑒定宛平王氏家藏胡氏茨村藏書譜印

始豐稿十四卷 明初刊本 黃善圃藏書

徐一夔大章著

一夔字大章天台人嘗游徙嘉興及海甯危大參素薦授建甯路學教授入明試杭學教授徵修元歷大明集禮將授翰林官以足疾辭仍實授杭州府學教授年逾七十卒於官嘉勝野開

所載明太祖怒其表文有天生作則斬之者誤也千頃堂書目
載始豐類十五卷朱氏靜志居詩話云大章遺稿罕傳余見之
王貽上所凡十四卷皆雜文無詩與四庫著錄合此一卷至
六卷乃明初所刊卽竹垞所稱家藏之本後七卷至十四卷乃
續刻爲黃堯圃影寫顧抱冲藏本跋稱字體頗得其似迥非鈔
胥比矣有汪士鐘讀書三十五峰園主人員喬謫齋水竹墅鳳
皇池上客諸印別藏刻本卷九至卷十一凡三卷亦有黃丕烈
印堯圃兩朱記余雖補鈔全帙不能知黃氏影寫顧本之工又
不忍將黃氏所影者撤去故兩存之

望雲集五卷

袁村樓鈔本

明郭奎撰奎字子章以字行巢縣人嘗從青陽余闕學治經青
陽亟稱之世亂飄零江湖間朱文正於南昌開大都督府嘗參
其軍後文正得罪奎以不諫被法詩格清剛句無浮響蒼涼激

楚一發於詩集有趙汭宋濂二序嘉靖辛卯郡後學吳廷翰付括守吳亞夫校刊廷翰有序此本版心有裴杼樓三字蓋新安汪氏鈔本也

西郊笑端集二卷

鈔本

松江董良史著後學周庠校刊

明董紀撰紀字良史更字述夫上海人時與會稽楊廉夫曲江錢惟善郡人陸宅之以古學鳴洪武壬戌舉賢良方正擢江西按察僉事辭歸結西郊草堂以終老在元官主蒨溪周鼎家塾興之所至發而爲詩多不留稿客或見之則曰供一笑而已有煮鶴一詩結句云恐襲乘軒弊防微意亦深可稱翻新出奇不獨題海屋詩過橋雲磬天台寺泊岸風帆日本船之膾炙人口也集藏鼎家成化中鼎孫光祿少卿庠始爲刊印有宣德辛亥鼎跋并同郡張勣錢溥二序

松雨軒集八卷

舊鈔本 何夢華藏書

明平顯撰顯字仲微錢塘人洪武初以薦授廣西藤縣知縣謫戍雲南沐黔國公請除其伍延主西席卒年七十五集初刻於滇南有景泰元年雲南按察司池陽柯進宣德五年東吳張洪爲序嘉靖時裔孫本楷樸重爲刊版邑人陳寔爲序 四庫館開時未及搜錄儀徵阮氏元撫浙時進呈 內府著爲提要云遜序稱其足迹半天下有似於子長學博而行峻直道而屈身云云今觀其詩及風土之同異道途之阨塞以及友朋之離合悉見於篇蓋得於遠游之助爲多耳此本有錢塘何元錫字敬祉號夢華又字蜨隱圖記蓋夢華在文達幕中所錄也

梁園寓稿九卷

正德刊本 陳奕禧藏書

夏臺王翰時舉著曾孫繼善編梓

翰禹州人元季隱中條山明初爲周王櫺長史翰知王有異志

屢諫不聽斷指佯狂而退王敗得免坐舉後起爲翰林編修旋
謫廉州教授值夷獠亂城陷抗節死所爲詩文勁氣直達自抒
胸臆一洗纖穢之習明史藝文志載敝帚集五卷寓稿九卷敝
帚未見朱檢討明詩綜未錄其詩罕見可知此本前有正德戊
寅九川呂經序並鈐陳奕禧印

白石山房逸稿六卷

勞氏校鈔本

浦陽張丁孟兼撰

孟兼名丁以字行浦江人洪武初徵爲國子監學錄與修元史
以太常丞出爲山西按察司僉事遷山東按察司副使以執法
不阿爲吳印所誣棄市明史附趙堦傳稿二卷上詩下文附錄
一卷此本爲仁和勞權平甫所校補有平甫識語并圖記

白石山房逸稿二卷

舊鈔本

張學安藏書

浦陽張丁孟兼

孟兼文六卷藝文經籍兩志所載相同原本久佚十一世孫思煌搜湮拾沒編爲五卷中錄他人唱和題贈轉浮原作此本較多數篇或出明人手編前有宋濂手識劉伯溫序張孟兼文稿後有義門鄭淵撰白石山房稿跋有張紹仁印學安張氏祕篋讀異書齋四印

臨安集十卷

舊鈔本

文林郎國子博士致仕錢宰著

宰字子予一字伯均會稽人吳越武肅王十四代孫名臨安不忘所自登元至正中甲科親老不赴公車教授於鄉唐之涪韓宜可皆出其門入明徵修禮樂書尋以病歸洪武六年授國子監助教偶賦早朝云四鼓鼕鼕起著衣午門朝見尙嫌遲何時得遂田園樂睡到人間飯熟時明日文華宴畢上諭曰昨日好詩朕曷嘗嫌汝何不改憂字又曰放汝去好放心熟睡矣二十

七年又召修書傳會選書成賜加博士致仕其詩波瀾老成諸體悉稱文亦謹守法度無卑冗之習詩文各五卷均有自序四庫從大典輯出釐爲六卷此則原本也

鄱陽劉彥昂詩集九卷

舊鈔本

文瑞樓藏書

鄱陽劉彥昂撰門生同郡劉子昇編太史會稽楊廉夫評

彥昂名炳以字行鄱陽人元季政壞兵亂嘗與弟煜結義旅保鄉里得免於寇旋依余闕於安慶以軍孤城危辭歸洪武初獻書言事授中書典籤出爲大都督府掌書記除東阿知縣引疾歸所著名春雨軒集乃門人劉子昇編此不知何人改題前有洪武著雍攝提格元虛羽人序云湖海間大丈夫每有以劉彥昂詩示予多爲之賞歎丁丑冬乃惠然過我相與唱酬才識瑰邁該涉博備可謂肩盛唐而擬諸晉魏者矣又臨川危素序云予觀彥昂五言類章蘇州律詩本少陵樂歌駸駸乎漢魏晉宋

齊梁矣一何其聲之似古人也又金華宋濂序云頗聞其先人友梧翁乃月灣吳公高弟善爲詩與文靖庾公文安揭公禮部吳公極相友善遂由縣文學薦詞林未上而天其家庭相傳必有卓絕於人者不然彥昂之詩何爲膾炙人口而不厭哉又曾稽楊維禎序云彥昂先大夫友梧君與吾同事場屋辱交於王眉叟眞人之丹房而鴈飲焉時泰定丙寅秋也彥昂於予有通家之契信乎其家學之有淵源也又鄱陽徐矩序云劉君彥昂以詩鳴於時得其所爲春雨軒集者讀之巍乎其峻也浩乎其廣也廓乎其容也窅乎其深也濶乎其清也濯乎其新也蓋所謂深於道者也所謂惟意是適而動中乎準繩者也所謂千變萬化而不可一律裁者也所謂可以移風易俗而厚教化者也是亦詩之至矣有余闕周伯溫兩跋卷一至七爲賦操樂府古今體詩卷八南詞卷九雜文後附翰林待制李燦撰故府君劉

公墓誌銘劉公諱明字哀明又余闕撰劉府君墓碣府君諱斗
鳳字友梧乃彥昂之父也又宋濂撰鄱陽劉節婦朱氏墓碣銘
朱氏諱則中乃彥之母也安成周浩撰故處士鄱陽劉公墓志
銘處士諱由孫字傑夫乃彥昂之祖也又同郡許瑤撰澤存堂
記烏傷王禕默齋蔡深同撰春雨軒二記皆爲彥昂作也俞貞
木周象初並爲後序有結社溪山文瑞樓金星齋藏書記浙江
盧氏寶鳳樓藏書印四明盧氏抱經樓藏書印

鄱陽劉彥昂詩集九卷

舊鈔本

鄱陽劉彥昂撰太史會稽楊廉夫評

此書前有臨川危素金華宋濂會稽楊維禎徐矩序後有同郡
許瑤撰澤存堂王禕撰春雨軒記及俞貞木周象初跋凡詩七
卷詞一卷雜文一卷此本紅格竹紙舊鈔版心有古炤堂三字
前有翰林院印曾經四庫館鈎勒塗改而發還者也

坦齋劉先生文集二卷

萬曆刊本

雲南提學副使宗晚學劉應峯訂正知茶陵州事韓城賈緣輯梓
同知州事高安張東陽校閱

明劉三吾撰三吾初名如孫以字行自號坦坦翁茶陵人兄耕
孫竄孫皆仕元三吾避兵廣西亦官靖州路儒學副提舉明兵
下廣西乃歸茶陵洪武十八年以茹瑺薦授左贊善年七十三
矣累遷翰林學士一切禮制及三場取士法多所手定御製大
誥及洪範注皆命爲序與汪叡朱善稱三老二十三年授晉世
子經降國子助教尋遷職懿文太子薨太祖召對羣臣慟哭三
吾進曰皇孫世嫡承統禮也太孫之立由此三十年主會試以
多中南人坐罪戍邊建文初召還卒鄭曉雷禮王世貞將一葵
並謂三吾誅死誤也茶陵李公文正張公文毅實繼之而起乃
文集在明時已不甚著成化中桐江俞蓋官茶陵時始爲輯刊

此本萬厯戊寅劉應峯重刊自爲序并有譚希恩一序前列先生遺象宋濂贊及正統四年永新劉定之題識成化十九年華容黎道題諸

武夷藍山先生詩集大卷 正統刊本 金星報藏書

明藍仁撰仁字靜之崇安人元末杜清碧隱於武夷崇尙古學仁與弟智俱往師焉授以四明任松鄉詩法遂謝科舉辟武夷書院山長遷邵武尉不赴明初隨例徙濠居瑯琊者數月集中有甲寅仲冬攝官詩似洪武七年亦曾仕宦者也詩法唐人閒入中晚已開十子先聲 四庫館不得其集從永樂大典中與藍澗集各輯爲六卷此本仁之子仲穆所編未及擬梓諸孫幹等始鋟以傳崇安邑宰縣水金君懷請羊城陳璉爲序時在正統二年先有雲松樵者張樂橋山眞逸蔣易及吉水倪伯文三序而張樂序後刻有洪武庚辰秋藍山書舍刊長方木記豈正

統開重刻耶不可知矣按杭大宗榕城詩話云何氏閩書仁有藍山集智有藍澗集竹垞嘗輯入詩綜集本合刻吳明經焯嘗於吳門買得藍山集是洪武時刊有蔣張二序與竹垞言合而藍澗集究不可購云云又按文瑞樓藏書記嘉靖丙戌山澗六世孫可軒監鉅等合刻二藍詩集豈明初集本各刊故藍澗集不能購得耶有家住黃山白岡之間金星輶藏書記汪魚亭藏閱書諸印

藍山集六卷

舊鈔本

朱氏結一廬藏書

明藍仁撰

原集已詳前記此乃當日館中所搜永樂大典之底本有翰林院印輾轉散出又爲塘栖朱氏結一廬所藏足與原本攷核其缺佚也

藍澗集六卷

舊鈔本

結一廬藏書

明藍智撰

智字明之仁之弟元末棄科舉與兄師杜清碧倡和爲詩洪武十年應辟授廣西按察僉事著廉聲處事平允三載始終無失德劉彥昂挽藍氏昆季詩云桂林持節還高風振林谷則暮年又嘗謝職歸里而張槃序藍澗詩則云客死他鄉不永天年是誤傳耳集久湮沒焦氏經籍志亦不載其目館臣從大典中輯出之與藍山集同爲六卷此卽輯時底本鈐有翰林院印又有塘栖朱氏結一廬圖書記一印

高太史大全集十八卷

景泰刊本

吳郡高啟季迪著南州徐庸用理編

啟字季迪長洲人至正丁酉張氏開藩平江諮議參軍饒介覽啟詩禮爲上客遂隱吳淞江之青邱自號青邱子洪武初召入纂修元史尋教功臣子弟授翰林院國史編修官三年擢戶部

侍郎自陳年少不習國計賜內帑放還退居青邱啟先以史事爲祭酒魏觀屬官雅相知契觀守蘇爲啟徙居城中夏侯里接見其密觀改修府治啟作上梁文連坐腰斬洪武七年也年三十九有鳳臺吹臺江館青邱南樓槎軒姑蘇雜詠諸集沒後無子其妻周氏藏弄諸稿授其姪立永樂元年鏤版行世景泰間徐庸會梓爲大全集有景泰元年吳劉昌序並列洪武二年胡翰王禕洪武三年謝徽伯鳴集舊序

高太史鳧藻集五卷附扣舷集一卷 正統刊本

後學周立編輯

明高啟撰啟詩才富健爲一代詞宗而古文則不甚著名然生於元末去宋未遠猶具前輩典型集末有魏夫人宋氏墓誌銘實魏觀之母也啟爲觀作蘇州府治上梁文坐法則末年所作已盡於此仍題周立編輯當亦其姑周氏所授或卽啟所自編

正統九年工部侍郎周忱撫蘇時得其鈔集於周公禮家藏且十年適監察御史錢塘鄭士昂過而見之乃屬司訓張素校正命長洲縣丞邵昕以公錢刻置郡學忱爲之序並列洪武乙卯同里李志光所撰高太史傳於前而附和舛集於後尙有鄭禺一跋已缺桐鄉文瑞樓金檀所刻者卽據此本也

缶鳴集十二卷

永樂刊本 五硯樓藏書

明高啟撰是集乃先生存日手自訂定之詩目錄下注卷一之十二卷詩凡一千首殆明詩統所稱侍郎坐法死所爲詩幾千首自蒼翠爲集凡四冊號缶鳴集列朝詩集所稱詩凡二千餘篇白選周介鳴集十二卷歿後無子其妻周氏藏其遺稿授姪立於永樂元年鑄版有洪武庚戌王禕洪武二年胡翰序洪武三年謝徵後序周立跋此本王胡謝三序鈔補周跋已佚有五硯樓廷樞之印袁氏又置五硯樓收藏金石圖書印此先生刻

本之最先者也

楊孟載眉菴集十二卷

寫本

姑蘇楊孟載著

基先本蜀之嘉州人大父仕吳中遂家焉幼穎敏絕人九齡背誦六經著論鑒十萬言淮張據吳辟爲丞相記室又客饒介所洪武初例遷臨濠三年放歸尋起知滎陽縣謫鍾離閒居秣陵用薦爲江南行省幕官又坐落職六年又起奉使湖南廣右召還授兵部員外郎出爲山西按察副使進按察使被讒奪職供役卒於工所基少負詩名楊廉夫來吳下屬賦鉞笛歌廉夫喜曰又得一鐵優於老鐵矣與高啟張羽徐賁稱吳中四傑成化中吳門張習官廣東僉憲訪求其詩僅爲十二卷梓工傳之江朝宗爲序嘉靖間鄉先生郎仁寶瑛著七修類稿尙稱其集甚少此從高安陳邦瞻重刊本寫藏者也

新刊靜居集四卷 萬厯刊本

潯陽張羽來儀著高安陳邦瞻德遠訂新都汪汝淳孟樸校

羽字來儀以字行更字附鳳潯陽人從父宦游江浙兵阻遂居吳興元末授安定書院山長明初徵起廷對稱旨擢太常寺丞兼翰林院同掌文淵閣事以事竄嶺外未半道召還抵京知不免自投龍江死年五十三羽五言古詩學杜學韋各有神理歌行材力馳驟音節諧暢不襲宋元格調律詩清圓渾脫全是唐音宏治辛亥張企翱習搜求其稿序刻之謂高楊張徐比唐之四傑故老言不惟文才之似而其攸終亦不相遠眉菴盈川令終如一太史之斃同乎賓王北郭雖不溺海僅全首領而非首邱來儀投龍江與照鄰無異噫亦異矣此爲萬厯中重刊前有吳興張睿卿題引後有金華童冀撰墓銘南郭呂勉挽詩近從石渠寶笈法帖中得其至正丁未追寫懷友詩廿三章附於後

張來儀先生文集一卷

士禮居鈔本

卷首有黃復翁丕烈識云余藏靜居集明初張習刊本未載其文四庫但載詩四卷云其文不傳而洪武時命作濮陽王廟碑又吾郡七姬權厝志亦羽撰文見行於世羽固非不以文著名也頃書估攜來雖殘毀已甚余詫爲得未曾有因出重資購之續檢文瑞樓書目靜居集四卷後又有文集一卷知金星軻家先有此書矣後又有蕘圃三跋按集中文爲湖州所撰者最多蓋來儀嘗避居苕上也中有竹深亭記脫文甚多以厲氏東城雜記填補可見樊榭老人曾見完書安得別有佳本校補其全耶寫手精工邵秀可愛

北郭集十卷

舊寫本

吳郡徐賁幼文著

賁先本蜀人徙常州又客吳城北之齊門故集稱北郭淮張據

吳辟爲掾屬吳亡例謫臨濠放歸與張來儀隱居湖州之蜀山
洪武七年被薦授給事中歷官河南左布政使會征洮岷坐稿
兵不時下獄歿明史附高啟傳成化丁未同郡張習搜其散亡
編校付梓同時吳興閔珪序其詩云其清也秋空皓月丹桂分
香其古也商鼎周敦宛存法象頗類晉唐諸公云萬歷間汪志
清重刻併爲六卷爲四庫著錄此猶影寫張企鵬僉憲初刊
之本也

半軒集十二卷補遺一卷楮園草一卷

宏治刊本

黃堯圃藏書

吳郡王行止仲著

行長洲人髫時從父爲閭門南市人市藥籍記藥物應對如流
晚爲主姬演說稗官詞話主翁異之授稗論翌日已成誦乃令
遍閱藏書既而辭去授徒齊門議論踴厲貫穿古今張氏據吳
隱居教授洪武初郡庠延入爲經師眾皆歎服其後郡守魏公

觀訪之不肯出洪武二十六年涼國公藍玉謀叛行以西塾連坐并其子阿定伏法集有洪武辛未同郡金文徵序宏治辛亥同郡後學張習所刻嘉慶間爲同郡黃丕烈所校補洵祕笈也有汪閔源藏書一印

陳聘君海桑先生集十卷

明刊本

廬陵陳謨著門人楊士奇編裔孫德文錄

謨字一德號心吾學者稱海桑先生古之泰和人以易詩書教授爲鄉郡所宗洪武初徵議禮以老辭所著有書經會通詩經演疏海桑集見大明一統志四庫著錄爲康熙庚申其裔孫邦祥重刊本中靈山寺詩以五言長律入古體崆峒雲居詩以古體入律體悼劉生詩又以七言拘律入古體士奇未必舛誤如是殆邦祥又有竄亂此本乃六世孫德文所錄其誤正同惟邦祥重刊詩文各五卷此則詩二卷文八卷目錄後有後學宜

山李資深僊耳郭九皋校正後學長樂曾一卿同校兩條又德文輯先生通傳一卷附於後前有永樂七年山東提刑按察僉事後學晏璧序稱先生生元大德乙巳而先生集中有歲己未乃洪武十二年上數乙巳正七十五年而通傳之首稱年八十六卒於家是爲庚午由辛未而下數永樂己丑晏璧作序之時正先生歿之二十年也書之貴乎先刊者如是如是

李草閣詩集六卷拾遺一卷雜著一卷附筠谷詩一卷

舊鈔本
魚亭藏書
汪

明李昱撰昱字宗表號草閣錢塘人少從進士永樂鄭公天趣學奇其才妻以女鄭嘗得詩法於李五峰昱十七歲嘗上五峯詩大稱之後結草閣於北關門外將終老焉旋避兵東陽永康間館於胡氏伯宏昆弟家洪武中奏補國子監助教尋以病歸仍就永康授徒其歿也葬之魁山下而其子轅字公載爲詩能繼其家不幸以瓊州宜倫縣丞歿於官詩文由是散失友人徐

孟璣陳公明及伯宏哀其古今詩四百餘篇門人唐光祖又拾其遺詩一卷并附雜文更以轅作筠谷詩附綴焉朱廉爲序此舊鈔本經吳石倉校閱有汪魚亭藏閣書一印吾友王松溪大令嘗刻於西江官舍松溪歿後版亦朽蠹余據此本重刊焉耕學齋詩集十卷

舊鈔本

汝陽袁華子英著河東呂昭克明編

華崑山人性穎悟讀書一二過輒記誦不遺工詩爲鐵崖所推重洪武初爲蘇州府學訓導其子爲吏被罪坐累逮繫卒於京師諸家著錄皆十二卷此十卷各體咸備別有可傳集一卷鐵崖序之云吾鐵門能詩者南北凡百餘人求如張憲及華輩不能十人可以見其詩之善矣

海叟集四卷

萬曆刊本

雲間袁凱景文著張所望叔翹校定

凱父可潛以詩鳴淞中凱幼孤力學少以白燕詩得名洪武間
由舉人薦授監察御史上慮囚畢命凱送東宮覆審東宮遞減
之凱還報上問朕與東宮孰是凱頓首曰陛下法之正東宮心
之慈上以爲持兩端不悅凱惶遽託癩疾歸上使人詔之佯狂
得免集四卷手自編定宏治間陸深購於京師寫之力爲表揚
焉此本前有正德元年北郡李夢陽序信陽何景明序萬厯已
酉邵人張所望重刊序後有陸深題語嘉靖甲子郡人董宜陽
隆慶庚午何玄之萬厯庚戌張所敬跋

在野集二卷

張生堂鈔本

張芷齋鈔本藏書

雲間袁凱景文著後學張樸校選後學朱應祥評點

前有天順甲申山東兗州府沂州儒學學正同郡張樸序後有
正德丙寅山東按察副使提督學政江東陳鏞跋稱今方伯鄢
陵劉公守淞時於是集尤極珍慕攜以自隨至山東捐俸重刊

此本版心有淡生堂鈔本五字又有松下藏書張載華印佩兼
荃齋圖籍錢夢麟家藏印諸圖記 四庫提要稱此書多以已
意更竄然當原本未見之時刊餉後學似未可遽廢也

自怡集一卷 趙氏鈔本

括蒼劉璉孟藻著

璉青田人誠意伯基之長子洪武十年爲攷工監丞兼監察御
史出爲江西布政司右參政爲胡惟庸所脅墮井死事蹟附兄
明史劉基傳是集爲其子所編僅詩九十四首多半五言古體
皆思沈力摯詞旨高超七言律詩則輕圓流利不媿淵源集前
有洪武十三年秦府紀善同郡黃伯生序後有前翰林國史院
編修同郡吳從善哀詞此本末有乾隆戊子夏日杭郡趙氏竹
影齋較錄一條并有古歡書屋趙輯甯印諸圖記

殷強齋先生文集十卷 正統刊本 葉文莊藏書

門人余燾編

明殷奎撰奎字孝伯一字孝章其先出華亭徙居崑山幼與盧熊同受小學長從楊廉夫授春秋應江浙鄉試不利有司延訓州學洪武四年薦赴京師試春秋道統論置高等例授郡縣以母老請近地便養拂當軸意調咸陽教諭時咸陽久罹兵革士不知學奎往任文教大行念母致疾卒於官舍年四十有六門人私謚文懿先生弟璧字孝連徒步二千里以其喪歸奎志不欲以文章名後世而其文則溫潤縝密動合矩度洵爲有德之言新安余燾從先生學官至家宰刻不忘師聚諸稿合曰強齋先生集既序之以錢塘陳振祖同事崑學請爲序未版行而燾謝世正統十二年後學龔誦於其孫援家得余公手錄本因遇東海王叔正捐金刻成誦作後序以明校刻始末其盧熊行狀哀辭墓銘祭文挽詩均載十卷中末有康熙己丑五月何焯記

曰集刊於正統十三年顧今已難得此出崑山葉氏猶是文莊公書也有右僉都御史印南陽叔子苞印二泉下學齋書畫記諸印

劉仲修先生詩集六卷文集二卷

舊鈔本

明劉永之撰永之字仲修臨江人少時隨父宦游四方嗜學能文迨遭喪亂與郡士楊伯謙彭聲之究論雅道如承平時洪武初徵用儒雅一至京師宋氏景濂道同意合留之不可乃賦詩餞之忽嗣子奉獲罪邑令乃籍其家奉既死承之亦徙東萊至桃源病卒新喻章詒爲采輯其詩文得若干何光從而編次洪武壬戌同郡梁寅序首嘉靖癸丑其裔孫東園重刻先集清江敖英書後

鼓枻稿一卷

舊鈔本

明虞堪叔勝甫

堪字勝伯宋丞相雍國忠肅公八世孫自堪以上居吳堪積學克世其家嘗搜訪先忠肅公文集於蜀中世亂不果一時各勝多爲詩歌祖其行自先世譜系與凡象笏保藏不失學博行修居笠澤吳興施縉創義塾延以爲師洪武中爲雲南府學教授卒於官古體氣格頗高近體音節諧婉集乃門人襄陽邱晉民編輯後載先生白跋今不存四庫著錄作希澹園集三卷也是間書目作鼓枹稿又有荆溪山人詩者而宋樓藏書志載有宋氏寶王較本及黃氏蕘夫跋本云舊爲香嚴書屋所藏予因罕祕出重價收之

全室外集十卷

宋樂刊本

天台釋宗泐季澄

宗泐臨海人洪武初舉高行沙門居首命住天界寺尋往西域求經還授左善世先是太祖幸天界泐方住持賞其識儒書知

禮義命畜髭髮長數寸欲授以官固辭太祖親作免官說時
宋學士濂好佛太祖目爲宋和尚泐好儒太祖呼泐爲秀才嘗
奉詔製贊佛樂章蒙嘉歎賜和平日所作詩晚歸老鳳陽之樺
峰敕曰寂寞觀明月逍遙對白雪汝其往哉後智聰生胡惟庸
黨詞連泐及來復謂泐西域取經惟庸令說土番爲外應有司
奏當大辟詔免死其受知者深矣此集第一卷皆欽和御製及
應制之作首題補刊二字蓋必有所證而補編以冠其端二卷
爲樂府讚佛樂章皆在焉三卷五古四卷七古五卷五律六卷
七律七卷七絕八卷六言五絕九卷蔬十卷續集前有徐一夔
序云季潭學博才瓌詩不淪於枯寂在江湖在山林在殊方異
域眾體具美朱有序云泐公識地高邁調趣清古風度悠揚昂
然若霜晨老鶴聲聞九皋澹乎若清廟朱絃曲終三歎王達善
序云潭公詩章渾涵汪洋千彙萬狀而一以理爲主卷端蓋翰

林院印且多塗乙之筆當爲館中底本也

者山無爲天師峴泉集六卷

明刊本

蔡少泉藏書

五十一代嗣孫顯庸重校

明張宇初撰宇初字子璿貴溪人張道陵四十三世孫洪武十年襲掌道教建文時坐法奪印永樂中復襲嘗受法於長春真人劉淵然其文如空行之雲入秋之水詞賦詩歌亦極婉麗清新均得自然之妙集故二十卷金華王紳及遼王新安程通爲之序四庫著錄者僅四卷提要稱所作皆雜文末附歌行數十首此本有崇禎間文震孟鄒鳳梧重刊兩序凡六卷核之文淵閣本始知五六兩卷皆闕也有少泉蔡氏珍藏印少泉江右人嘗捐職主事往來京師收賣書籍年七十餘歿

會稽懷古詩一卷

舊寫本

鳴野山房藏書

山陰唐之清著長洲戴冠次韻

愚士自號卧游居士肅之子也建文初以方正學薦修鑑戒錄授翰林侍讀與正學同領書局卒於官明史附文苑王行傳冠嘗秉鐸於越前有之淳自識云余性好遊故凡山川祠宇之在吾郡者靡不極其幽遐以自放於荒忽偉奇之境間於暇日萃諸嘗遊之所各爲一詩詩凡三十首不足以著揚鄉土奇勝之萬一然於君臣父子之際一事一物之微寓美刺焉將俟續乘者之去取云爾時洪武辛酉十月又紫霞子序同郡翁好古序天台王俊華序天順五年山陰張博士習後識而宏治庚申戴冠序云會稽懷古詩惜余冷官未及翻刻歲己未河南杜侯宏以名進士來尹山陰優於治邑就余問郡中文獻予以此對侯卽欣然命工鐫刻云云後有題云嘉慶庚午山陰沈復燦搜輯明以前鄉賢詩得是集於同邑杜孝廉煦家因假歸影摹一本以廣其傳有鳴野山房一印

退菴鄧先生遺稿七卷

舊鈔本

古岡鄧林著會稽陳贄編集鬱林陶魯富川葉芳龍巖王命濬邑人黃澹重校梓

林初名觀善字士齋新會人洪武丙子領鄉薦爲廣西貴縣教諭致滿入京師大學士楊士奇祭酒李時勉閱其詩文相謂曰嶺南一代文人也暫留史館修書尋出教南昌多有薦其學行者乃遷吏部驗封主事太宗改名曰林宣德四年以事忤旨謫戍保安遇赦晚居杭州餽里仁坊居之杭士大夫多從之游與布政使姚肇處士夏誠諸人譙遊倡和仁和張震編其杭州郡邑志俱入寓賢傳景泰時會稽陳贄得是集於先生仲子時習已有殘缺重纂成編欲刊未果自爲一序後陶集同爲梓行萬厯間先生裔孫良臣悲舊刻殘蝕謀之龍巖王命濬與邑人黃清重爲校梓後有天順時四川建始縣教諭一跋名已闕

鳴秋集二卷 舊鈔本

明趙迪撰迪字景哲懷安人詩分上下二卷前有永樂癸巳賜進士及第翰林編修邑人林誌序云故膳部林君子羽始倡古詩於閩和之最有聲者僅二三人今鳴秋先生其一也是集古詩要不下總管而謂作則隨手出矣母容一言贊也後有景泰五年孤子壯識云壯有繼繼先人奄棄大兄尚幼荷慈母鞠育教誨至於成立宣德己卯濫竽科目幸叨微祿痛念先人值時多故授老林泉著作惜塵存十之一二壯不肖弗能光紹先志敢沒先人所存敬錄壽梓云附壯作贈臚峰陳日章赴春閣詩十四首壯宣德十年鄉舉官南海知縣稱白湖趙壯列朝詩集據湖海耆英集載迪元父應制詩皇明風雅云宜陽人官吏部侍郎明詩綜云牧齋辨景哲非山人其實不然林孝廉信藏鈔本鳴秋集有迪仲子壯後序云云而同時閩人鄭閩鄭關郭塵

均有輓鳴秋山人詩則宜陽吏部侍郎賦元夕應制者是別一人矣壯遺事載閩省賢書

練中丞文集二卷附遺事一卷崇祀實紀一卷

萬曆刊本

汪季青

賜進士及第吏部侍郎峽江松月練子甯著

子甯名安以字行新淦州人幼從鄉之長者竹莊先生遊命賦水竹村居詩有千山暮雨石泉通一夜春雷擗龍長之句竹莊奇之遊邑庠與金幼孜友善嘗謂曰子異日必爲良臣我當爲忠臣洪武十八年廷試入對言近日朝廷用人徇其名而不求其實以小善而遽進之以小過而遽戮之因歷陳古人所以教養任用之道言甚剴切帝覽之喜擢一甲第二授翰林修撰益以名節砥礪時陞吏部右副都御史建文朝與方孝孺特見信用靖難兵起日夕畫策防禦李景隆敗還極論其奸邪請誅之時蕭用道周是修上書指斥用事者誤國之罪齊黃誥之子甯

曰事至此尙不容人言乎詎者魏而止永樂卽位詔治奸黨李景隆言於上必欲殺之練子常至語不遜斷其舌遂族其家宏治中瓊海王佐輯其遺文曰金川玉屑集正德中江西提學副使李夢陽爲祠以祀并刊其集此萬厯己酉泰和郭子章序刊本并遺事一卷崇祀實紀一卷有休甯汪季青家藏書籍印

遜志齋集三十卷拾遺十卷附錄一卷

成化刊本

明方孝孺撰正學之文昌明博大開闔自如雖有小韓之名實與大蘇方埒世居臨海侯城里洪武丙辰謁宋太史於翰苑丁巳執經於浦陽山中先後四年盡得其傳召至京除蜀王府教授獻王師事之建文帝召爲翰林博士進侍講靖難時以死殉永樂初文禁甚嚴宣德後稍傳於世此成化己亥黃巖謝鐸與黃孔昭因天順中趙教諭洪初刊未備乃蒐葉文莊盛林秋卿鶚王忠公之孫汶所傳錄者又從柳別駕演盡得時人之所藏

視昔不啻倍蓰甯海令郭君紳願傳諸梓喜而序之云次年庚子太平黃孔昭又爲序越翌歲壬寅南安府知府華亭張弼書其後是爲第二刻惜闕一二三六八凡五卷其第四五兩卷首尾復有關葉拾遺闕第六一卷見之三十年不能得其全也

遜志齋集二十四卷附錄一卷

嘉靖刊本

浙江按察司副使提督學校雲間范惟一浙江按察司僉事南昌唐堯臣浙江台州府知府東吳王可大校刊

初孝孺既死門人王叔弼收其遺文藏之宣德後稍傳於世天順癸未初刻詩文僅二百六十七首有林公輔王紳二序及臨海趙洪序是爲蜀本再刻於成化庚子凡四十卷爲文干二百首有謝鏐黃孔昭序張弼書後甯海令郭紳刊是爲邑本正德庚辰顧尚書璘守台刪併爲二十四卷梓於邵齋是爲郡本璘有序此本嘉靖辛酉王可大守台與提學范惟一兵憲唐堯

臣據上三刻重加審定有刪有補是爲第四刻卽今所傳定本
也有范唐王三序及徐階序并正學小像後有附錄一卷

希董先生遺集五卷

舊鈔本

瑣川吳氏藏書

明茅大方撰大方字希董泰興人有學行洪武中爲淮安府學
教授致績入朝召對悅之擢泰府長史且勉以董子輔相之業
未踰年泰國稱治因大書希董之堂以彰聖訓方孝孺有記建
文時官副都御史靖難兵至死於難正德末始祠於鄉遺文則
宏治初柴墟輯成五卷從子洵嗣子顯乞弋陽姜潛爲序實嘉
靖壬辰也次年泰興令山陰朱麓刻之自跋於後朱彝尊曰希
董集流傳未廣集中如萬山入漢秦關險孤棧連雲蜀道難縱
使火龍蟠地軸莫教鐵騎過天河花間鶯避春城仗林杪僧歸
晚寺鐘萬里不來青鳥使千年空老碧桃花皆佳句也按四
庫著錄革除時人文集自練子雷至戴詡凡八家而此集未經

著錄傳世之罕可知矣有璜川吳氏收藏圖書

王靜學先生文集三卷

寫本

明王叔英撰叔英名原宋以字行黃巖人洪武中與楊大中葉見泰方孝孺林右同徵至京固辭還鄉建文元年孝孺欲復井田貽書阻之部使者辟爲仙居訓導德安教授擢漢陽知縣尋召爲翰林修撰上資治八策皆援古證今鑿鑿可行靖難兵起奉命募兵廣德聞建文遜位知事不可爲書絕命詞自經於元妙觀銀杏樹下年未四十道士盛希年爲之收葬後妻死於獄二女死於井四庫著錄止一卷凡三十篇僅序記二體按是集初刻於成化壬辰邑人謝省爲後序徐孚爲跋謝氏赤城新志云靜學集有版刻卽指此本再刻於萬曆丙子知太平縣事翁仲益爲序益以漢陽求雨文三篇及黃綰所爲傳三刻於康熙乙酉太平參將郭鎮邦爲序四刻於嘉慶甲子邑人項調陽

爲序補利害策一首又附弔謁詩七首今復據赤城論諫錄補資治策八首并序一首釐爲三卷而附序跋傳記等十六首弔謁詩七首爲首末二卷於靜學之文亦庶幾備云又聞胡心耘有舊鈔本六卷附錄一卷心耕名珽仁和人居蘇州亂後不知書在人間否

黃忠宣公文集十三卷

明刊本

明黃福撰福字如錫號後樂翁昌邑人洪武甲子舉人累官南京戶尚書兼掌兵部參贊留都機務卒贈太保忠宣明史有傳有後樂堂彙此爲其子琮所編卷一列奉使安南水陸記卷二爲序卷三四爲書卷五爲祭文卷六爲表論頌譜銘贊卷七檄文卷八雜著卷九至十三古近體詩有正統三年建安楊榮四年南郡楊溥及交河馮時雍序四庫存目載集八卷蓋有文無詩耳

巽隱先生集四卷

萬曆刊本

桐鄉縣知縣濮陽斐捐俸梓行儒學訓導李詩校正編次縣丞顧同校刊

明程本立撰本立字原道號巽隱桐鄉人少受學於金華朱震亨兄弟又從同邑鮑恂貝瓊游操筆爲議論侃侃負氣節洪武丙辰舉明經推秦王府引禮舍人以母憂去復改周王禮官從王入覲坐累謫雲南時內附未久蠻夷爲變本立統領撫綏不避艱險開導利害遇飢賑卹諸夷咸悅軍民咸安應天府尹向瑄學士董倫交薦其文學治行召入翰林署左僉都御史出爲江西按察副使適靖難兵已進京師悲憤自盡所著巽隱集詩文各二卷其曾孫仙編宏治乙丑桐鄉令李廷梧序之嘉靖中南溪吳氏西虞范氏先後刊版未幾湮佚此萬曆元年濮陽斐得其集於裔孫九澤而屬李詩校刊者也有斐序及詩後跋仍

列李廷梧與蘇靖林廷柟原序於前附錄事狀畧有樞李蔣石
林藏書畫印朱記

易齋彙五卷補一卷

明初刊本

汲古閣藏書

謹按四庫提要易齋集二卷明劉璟撰璟字孟光青田人誠
意伯基之次子洪武二十三年太祖命襲父爵特設閣門使授
之尋爲谷王府左長史燕王稱兵隨谷王歸京師令參李景隆
軍事兵敗上書不見省遂歸里成祖卽位召之稱疾不至逮入
京下獄自經死事蹟附明史劉基傳所著有越吟稿無隱集易
齋集崇禎壬午青田令楊文聰從諸生蔣芳華芳蔣兄弟得鈔
本篇章淆雜反覆攷訂始序而梓爲二卷此本卷一至五有虞
山毛氏汲古閣收藏汪魚亭藏閩書兩印與千頃堂書目十卷
合惜闕下五卷核與楊氏二卷本多出古詩四十餘篇五七律
五七絕詩一百餘篇而以楊本之詩賦琴操序傳記書銘箴頌

題跋錄於後

右別集類十三

善本書室藏書志卷三十六

錢塘丁丙松生甫輯

集部十五

解學士文集十卷

嘉靖刊本

明解縉撰縉字大紳一字縉紳自唐時家吉水洪武戊辰進士授中書庶吉士永樂卽位進侍讀學士直文淵閣預機務踰年進翰林學士出爲廣西參議改交趾八年入奏會值北狩見東宮辭去高煦譖之下詔獄十三年瘐死明史有傳縉天才奔放所爲詩文盛傳人口然眞贋莫別天順元年金城黃諫始裒其集凡三十卷自爲序又有任亨泰蔡弼二序後亦漸湮此有嘉靖壬戌羅洪先序云杜史遵化古松段公來江南從其從孫桐輯錄爲十卷求加詮次稍剔其僞不盡刪繁也後附墓誌等文

素軒集十二卷

明刊本

明沐昂撰昂字景顒黔甯昭靖王第三子定遠忠敬王之弟以
左都督鎮守雲南正統間討平麓川寇任思發威著西南餘暇
留情文詠輯明初名士官於滇及謫戍者自邾仲經以下二十
一家詩凡二百五十首曰滄海遺珠楊東里序之與其子錦衣
副千戶沐僖孫右都督總兵沐璘均能武緯文經並著聲績天
一閣書目及文瑞樓書目均載僖字可昭著敬軒集四卷璘字
廷璋著繼軒集十二卷世稱三軒集而千頃堂書目則單列素
軒集豈先有專行之本與此帙相合歟惟文瑞樓記稱素軒集
刻於天順間行世已久嘉靖時重梓此帙前後無序跋豈書賈
因三軒不全而割去之歟

逃虛子詩集十卷續集一卷逃虛類稿五卷補遺一卷道餘錄一卷
馬氏鈔本

資善大夫太子少師吳郡姚廣孝

廣孝釋名道衍字斯道俗姓姚氏長洲人本醫家子不肯學醫
喜爲儒學至正間削髮居相城妙智庵里中靈應觀道士席應
眞通兵家言嘗師事之深自退藏惟王止仲深知之嘗寓嵩山
寺袁珙相之曰公非常當劉秉忠之儔也洪武初以高僧徵十
五年十王之國道衍在燕籍中住持庵壽寺靖難兵起贊助祕
密永樂卽位召至京欲官之辭爲僧銓左善世東宮立特授太
子少師復姓賜名輔太子南京監修高皇帝實錄命畜髮不肯
以賑濟歸吳徒步閭里以賜金散宗黨永樂六年仍居北京慶
壽寺病篤車駕臨視問後事對曰出家人復何所戀明日逝年
八十四追封榮國公謚恭靖賜塋在房山縣東北御製碑銘道
衍初與高啟爲北郭十友之一所著初名獨庵集沒後吳人合
刻之曰逃虛子集詩則清新婉約頗有古趣文則皆方外之作
尙有別集乃應酬世俗之文彼教中所謂外集今不傳道餘錄

皆詆程朱尤無忌憚其友人張洪謂人曰少師與我厚今死無以報之但每見道餘錄輒爲焚棄孰知死後五百年焚之不盡其不能掩惡益可徵矣此本出自舊鈔有翰林院印冊面有乾隆三十八年四月兩淮鹽政李質穎送到馬裕家藏姚廣孝逃虜子集壹部計書肆本朱字木記

光菴文集一名舊鈔本 毛古愚藏書

長樂王賓仲光著

賓字仲光長洲人精於醫不樂醫富貴人遇里巷貧瘡者輒趨往診視且與藥餌奉母極孝年七十先母而卒病革抱母不舍郡守姚善賢卻騎從訪之傲不爲禮欲薦之不敢言也少與姚廣孝善廣孝旣貴訪賓世構賓方盥掩面而走然集中賑災記極稱揚廣孝之功德其沒也廣孝爲之傳吳兒委巷之語未可以爲證也集尙有吳中古蹟詩一卷今惟文集存集中敘吾杭

鹽橋詩侯廟極詳有西河毛古愚兩印

思復齋稿六卷

永樂刊本

文瑞樓藏書

明胡粹中撰粹中名由以字行山陰人治毛詩春秋三傳永樂初楚府右長史與管時旼俱參預講筵粹中乃撰學則一好學二勤學三思學四勉學及次第進學必成說以進詞理明暢人共傳之在王門悉心輔導凡二十年及卒府中皆涕泣著漢史筆紀元史續編行於世此書前有丁鶴年序云故長史朱公廉紀善貝公朝今左史管公時旼胡公粹中皆以所學施於有政發爲文章尤爲人所誦管公矧竅集貝公舒菴集悉有雕版而朱公之文先鏤於金華獨粹中後至未有刻本及是刊爲思復齋稿云云此本雕鏤精工有文瑞樓真意結社溪山家在黃白岡之間金星輶藏書記汪魚亭藏閱書各印

東里文集二十五卷詩集三卷續集六十二卷別集四卷附錄四卷

天順刊本

文瑞樓士禮居藏書

廬陵楊文貞公士奇著

士奇初名寓泰和人初爲學官失印避地武昌改名楊立可楊仲舉見而奇之後以字行建文時召入翰林永樂靖難改編修入直文淵閣歷事三朝累官少師華蓋殿大學士正統六年卒年八十贈太師謚文貞明初相業稱三楊公爲之首詩文號臺閣體文集二十五卷正統五年永嘉黃淮序詩集三卷正統元年江陵楊溥序續集六十二卷正統九年金陵李時勉序有嘉靖庚戌袁郡嚴嵩重刊序成化九年吳郡韓雍書後別集四卷一聖諭錄一奏對錄一敕附錄四卷則詔命敕諭傳贊祭文墓銘也每卷末有天順某年某月男道禾編定一條有文瑞樓金星輶藏書記黃丕烈印堯圃諸印

盤谷集五卷

黃氏本

明史藝文志焦氏經籍志並載盤谷集十卷劉薦撰薦字士端
誠意伯基之孫洪武二十四年嗣伯食祿五百石明年坐事貶
秩歸里洪武末坐事戍甘肅赦還建文朝及成祖皆欲用之以
奉親守墓力辭永樂間卒事蹟附明史劉基傳此本有詩無文
當佚後五卷耳前有門人同里甘泉生陳谷序稱年未三十膺
襲重爵免而退居有屣脫富貴之心卜築西雞山下名之曰盤
谷日與文人秀士尋幽挾勝寓情山水觸物興懷於詩文見之
云按誠意伯文集未見佳刻此雖鈔本與易齋稿版刻同爲每
葉二十四行行二十四字當卽古今書刻所載處州府有盤谷
唱和無隱集自怡集易齋稿劉府稿同爲一時之所刊者五百
年來零落如是可慨又可幸也

陶情集六卷

精鈔本

姑蘇易恆久成

恆本廬陵人曾祖斗南宋進士爲平江常熟尉攝崑山因家焉
恒能操勵循其家範闢地引泉蒔花藝竹名曰泗園歌咏其中
家貧日常不給視聲利泊如也洪武初應薦以老歸年八十餘
終其示諸生云情婉味終涵雋永調高語不在矜持可以見其
吟品矣前有永樂三年吳興莫士安序後有永樂四年汝南周
傳跋

楊文敏公集二十五卷 正統刊本 瓶花齋藏書

明楊榮撰榮字勉仁建安人洪武己卯舉於鄉明年成進士除
翰林編修永樂卽位陞修撰直內閣參掌機密敕修古今列女
傳擢春坊諭德兼侍講丁亥命往甘肅規畫軍務己丑聞計當
去職車駕將幸北京特留扈從及太宗不豫受遺命輔仁宗進
太子少傅兼謹身殿大學士工部尙書正統五年春命歸展墓
遣中使隨行拜掃事竟回次杭州七月壬寅卒於武林驛享年

七十贈特進光祿大夫左柱國太師謚文敏公之文章見於詔
詰命令訓飭臣工誓戒軍旅撫諭四夷播告萬姓莫不嚴正詳
雅曲當人心出其緒餘作爲碑銘誌記序述贊頌以應中外人
士之求又皆富贍溫純動中矩度詩亦備極諸體清遠俊麗趣
味不凡稿則公子尙寶寺丞恭藏於家正統五年豫章胡儼先
序其兩京類稿正統十一年泰和王直及吉水錢習禮又爲之
序迨正德十年版遭回祿重爲翻刻總名曰楊文敏公集共二
十五卷永嘉後學王瓚序之附錄二卷皆志銘之文也有吳城
敦復二印

省愆集二卷

正統刊本

馬半查舊藏

明黃淮撰淮字宗豫永嘉人洪武三年進士除中書舍人靖難
後命直內閣兼武英殿大學士累加少保戶部尙書宣德二年
請老後再召至京賜遊西苑命主會試正統十四年卒年八十

三謚文簡明史有傳著有退直入覲歸田諸稿右省愆集乃繫獄時所作中有寶劍舞豐城爛斑土花碧又十年頓足園扉間時向牆頭看柳色可謂不失風人之旨矣前有自序宣德七年南郡楊溥八年建安楊榮臨江金幼孜爲序廬陵楊士奇爲跋正統八年京口王豫以按察副使行部至郡請梓以傳并跋於後有翰林院印馬氏半查珍藏書籍印蓋始進之四庫而發還者也

助教侯先生詩集二卷文集四卷

舊鈔本

門人黃迪芳編輯

明侯復撰復字祖望號觀雲進賢人官國子監助教詩豪放清逸效法青蓮文亦條暢有永樂九年天台楊觀序

南齊先生魏文靖公摘葉十卷

宏治刊本

南國縣知縣前纂修國史鴻臚寺序班男完編次通奉大夫福建

左布政使洪鍾校補

明魏驥撰驥字仲房號南齋蕭山人永樂乙酉舉人以進士副榜授松江訓導召修永樂大典擢太常寺博士官至南京禮部尙書謚文靖事蹟具明史本傳驥爲文一本諸性情所發而根於理道初不事雕刻務奇巧千百言下筆立就驥卒年已九十有八故篇章極富其子完編次成帙卷軸浩繁未及梓行而卒孫圻洪鐘閱視原稿凡題上有點注者摘取以付梓編成十卷蓋驥意所欲存者也卷一至卷四爲前集目下有注曰此南京居官時之作卷五至卷十爲後集下注曰此歸田時自景泰辛未至成化辛卯之作前有宏治十一年錢塘洪鐘序其中碑版之文爲吾杭作者最多大有資於掌故原不僅寶其文章之溫雅也書凡四冊爲余圻陳光照所贈據云書中雖無印記其尊人實得自十萬卷樓後人者其家尙存王氏舊藏殘本數百冊

余命其補鈔成帙乃未及半載而光照遽歸道山此願未知何
日能償矣書此以俟之

金文靖公集十卷

宏治刊本

賜進士兵科給事中男昭伯編

明金幼孜撰幼孜名善以字行新淦人建文庚辰進士授戶科
給事中靖難後首以文名與楊士奇等入內閣改檢討參掌機
密陞文淵閣大學士歷官至太子少保禮部尙書謚文靖居內
閣垂三十年此爲成化時家嗣昭伯所編詩文各五卷湖陽李
齡爲之序閱三十年版有錯落宏治癸丑知新淦縣事盧淵補
鈔其全復爲之序首載畫像贊敕諭誥命御祭文神道碑又外
集一卷今不存

節菴集八卷續稿一卷

舊鈔本

汪魚亭藏書

錢塘高得賜孟升

得賜字節庵錢塘人遷居臨安洪武間以文學薦三爲校官永樂初擢宗人府經歷充永樂大典副總裁分掌三禮詩文以清麗爲宗多不存稿所詠錢塘十景傳播人口此書首雜著一卷次各體詩七卷續稿一卷有姚廣孝序乃同修大典時所作鄒濟撰有墓志此本已佚有汪魚亭藏閱書一印

覺非齋文集二十八卷

天順刊本

四川按察使司按察使弋陽黃溥選編蜀府紀善吉安黎紘校正明金寔撰寔字用誠開化人永樂初詣闕條陳王道十篇嘉納之復問策二道對稱旨命入翰林預修太祖實錄授典籍又預修大典授春坊司直郎改授衛士遇仁廟登極陞左長史尋卒於京邸其文浩瀚馳逐清簡峭拔詞賦援經據騷瞻麗以則詩歌本唐人音響古體純似韋陶歿後二十年子統自蓬州守歸彙萃詩文而名之曰覺非齋文集屬先生門生雲間錢溥爲序

藏書志卷三十六

七

適溥之門生唐廷美瑜以禮科給事中守衢遂命刻之又有成化元年臨川黎久大序凡賦頌一卷詩八卷文二十一卷附錄楊士奇撰墓誌銘輓詩祭文一卷知衢州府事海上唐瑜爲後序按覺非之詩未見於明詩綜當時集已罕見惟千頃堂書目曾載其名 四庫亦未見著錄

王文安公詩集五卷文集六卷

樸學齋鈔本

男祐編集

明王英撰英字時彥別號泉坡金谿人永樂甲申進士太宗命解縉選進士穎秀者與狀元曾榮等二十八人入文淵閣讀書英與焉又與王直入祕閣書進呈機密奏疏修太祖實錄授翰林修撰扈侍講定太宗喪儀正統乙丑浙之台甯疫命祀南鎮以禳民癘時久旱至越大雨田野沾足有御祭感應記刻石廟中旋陞南京禮部尙書景泰元年卒年七十五謚文安後改文

忠此詩文集卷數與千頃堂書目合前後無序跋惟載四明陳敬宗撰傳明詩綜引蔣春甫云詩雄壯宏大氣象自好未檢討則稱其密切謹嚴句無浮響如別路斜陽京口樹他鄉明月洞庭船舊館空餘秦地月古壇猶似漢宮秋皆清圓可誦舊鈔版匡外有樸學齋三字

古廉李先生詩集二十卷

景泰刊本

馮開之藏書

南京國子監祭酒門人吳節編集致仕大理寺右少卿弋陽李奎校正

明李時勉撰時勉原名懋以字行安福人永樂甲申進士官至國子監祭酒卒謚文敬成化中改謚忠文明史有傳先生在朝廷以骨鯁稱在國雍以嚴正立身任斯道者四十餘年其文則春容而雅暢衍迪而宏肆懇懇乎仁義道德之敷陳無一語非規諷忠愛之心惻沒後三年門人吳節裒集其稿分十一卷景

秦七年弋陽李奎序之前有先生遺像楊士奇李奎並爲贊按
楊慎詩話云元武伯英詠燭剪詩嘯殘瘦玉蘭心吐蹴落春紅
燕尾香爲一時所賞李古廉詠剪刀詩吳綾剪處魚吞浪蜀錦
裁時燕掠霞深院響傳春書靜小樓工罷夕陽斜公之直節清
聲而詩嫵媚如是信乎賦梅花者不獨宋廣平也此詩不載古
廉集中金星輶補書於卷端有文瑞樓結社溪山身在書生俠
士間文瑞樓主人四印又有孤山草堂馮氏圖書二印乃明馮
開之舊藏終歸休甯汪季青家又有藏書籍印又有雲溪范藻
印此書豈爲名家所度尤可珍貴古廉尙有文集六卷惜不能
得耳

東行百詠集句三卷和三卷再和三卷三和一卷附年譜一卷

天順刊本

天都汪氏藏書

明陳循撰前有天順壬午循自引云余承恩譴東行省躬思咎

餘何所營因憶古人詩篇篇摘一句集成三百首中間地名數
目事拘拘不可用者則易一二字以從實亦十百中一二復各
和爲韻語通千餘首均分十卷附年譜一卷遺像二贊列於首
有門人同邑王翔子瑛跋按循字德遵泰和人甲午解元永樂
乙未會試第二人殿試一甲一名景泰中官至戶部尙書少保
太子太傅華蓋殿大學士英宗復辟請戍鐵嶺先是土木之變
也先擁駕入關會集防禦未幾虜悔送上皇還居南內壬午粵
西土官黃竑希寵奏請景皇立己子景皇令中貴以疏覘循意
循曰無易樹子霸者所禁堂堂天朝得毋敗萬世之譏乎景皇
不悅八年景皇疾不朝羣臣議請復立茂陵未及上而奪門之
兵起矣徐有功石亨以宿憾誣循遂謫戍未幾徐石敗循撰皇
朝中興四朝神聖功德頌四章詩二十首進呈得放還明年卒
尙有芳洲文集十卷續集六卷憫忠錄一卷均未見此本乃天

順問刊 四庫入存目有天都汪氏承雅堂圖籍陳書崖讀書
記兩印

于肅愍公集八卷附錄一卷

嘉靖刻本

黃氏廣仁義塾舊藏

明于謙撰此本前列成化二年諭祭文及嘉靖丁亥巡按河南
山西道御史新喻簡霄序刊於大梁書院蓋不忘公十八年之
遺愛也凡賦詩六卷文二卷附錄奏議序祠記祭贊詩篇按
四庫著錄爲十三卷本奏議十卷詩及雜文附錄各一卷此集
八卷無奏議尙在嘉靖間未易忠肅諡前所梓且鈐有長印大
書廣仁義學四字本印斜蓋於全部版心折縫處使人不能竊
取義學乃黃樹穀號松石所構在杭州武林門外東馬塍之北
前明少參直父先生故第卽其居開塾聚書其中供四方來學
者閱誦故卷冊用此印垂久今猶隱隱可認耳

古樓集三十卷

舊鈔本

明李賢撰

賢字原德鄧州人宣德癸丑進士歷官少保吏部尚書兼殿蓋大學士贈太師諡文達學者稱浣齋先生始以解元舉高第仕吏部暇手一編不輟受知泰和王文端公自郎中進侍郎定交河東薛文清公由文章窮理學既入內閣典機務謀謨制作任天下之重雖分局草史輪日講義仍親加點竄讀廷試策校庶常卷必親經裁定三楊以來得君未有其比所爲詩文質實嫻雅具有典型天順日錄雜錄等編足參史乘集爲其子璋與婿程敏政編次古穰縣在鄧之封內因以名集有成化三年永新劉定之序十年新安程敏政跋

倪文僖公集三十二卷

宏治刊本

鳴野山房藏書

明倪謙撰謙字克讓由錢塘徙上元日光如電體有四乳正統四年一甲三名進士歷編修至學士下獄謫戍開平赦還復官

與子岳同入史局改南京掌院終南京禮部尙書卒贈太子少保謚文僖所著有遼海編上谷稿玉堂前後稿歸山稿宏治癸丑謙子岳阜輩哀成是集屬長沙李東陽爲序岳識後前爲文僖小像涓安商輅關西楊鼎並有贊若萬安所撰神道碑劉珥所撰墓誌銘此本已缺有鳴野山房印

白沙先生全集二十卷

正德刊本

明陳獻章撰獻章字公甫廣東新會人父瑄年二十七歿母二十四而寡遺腹生獻章九齡尙以乳代哺幼仍多病專意性命之學穴牆進食者十年正統十二年舉鄉試次年禮闈中副榜入監讀書以廣東布政使彭韶總督朱英薦成化十九年赴京應選疏患病陳情稱生年五十六母年七十九視臣之衰如在襁褓乞恩終養不旨陳獻章自陳有疾乞回終養與做翰林院檢討親終疾愈仍來供職云云後屢薦不起宏治十三年卒學

者稱白沙先生莆田林俊稱其涵養粹完獨超造物牢籠之外而寓言寄興於風煙水月之間蓋有舞雩陋巷之風焉全集有六卷本吳門顧氏刻首列自序行狀墓表志銘像贊應召錄有九卷本門人湛若水校定萬歷間何熊祥重刊有白沙詩教解十五卷本湛若水輯解序刊婺源汪鉉有序又有二十一卷本嘉靖辛亥葉友山刻此二十卷乃宏治十八年門人張詡序稱先生詩集刻於山東者二十之五刻於梧州者二十之一耳而文則子弟門人所鈔錄散在四方未有會輯刻傳者宏治癸亥吉水羅君倫惟升以進士來知新會縣事政暇搜羅詩文爲全集屬詞序其端文詩各十卷羅倫有後跋正德戊辰莆田林齊重訂補刻更爲跋

白沙子全集九卷

嘉靖刊本

嘉靖三十一年九月門人湛若水校定大巡蕭友山始爲刊行

萬曆四十年菊月古後學何熊祥因林廣文嘉讓得若水善本
重付剞劂既自序之復屬吉邑門孫黃滔爲序而列若水白沙
子論及宏治間張謂羅僑嘉靖間高簡項喬隆慶間林會春原
序跋於前後附錄行狀銘表挽詩爲一卷 四庫著錄卽是本
也

誠齋牡丹白詠一卷梅花白詠一卷 舊鈔本

明周憲王有燉撰王爲定王長子高皇帝孫洪熙元年襲封千
頃堂書目載誠齋新錄三卷遺稿一冊誠齋牡丹梅花玉堂春
各自詠此本缺玉堂春一卷明詩綜不列其詩殆未見也牡丹
詩有宣德五年穀雨後五日自序云余種百餘本於天香圃覽
其佳者十餘品遇花開候置酒合樂與親朋共賞之不二日乃
成百篇梅花詩有宣德五年十一月長至日自序云余蒙恩守
國安居中土以樂昇平於所居之西製小閣植梅庭中當早春

時有端潔貞明之節操無紅紫妖冶之暢容因用中峯詩韻亦
廣百篇未足追蹤前人之韻此書傳本甚罕錄此以見有明宗
室之好學焉

雪溪漁唱集十卷

景泰刊本

盧氏抱經樓藏書

西蜀晏鐸振之編選戚里王貞慶善甫校正

明蘇平撰平字秉衡海甯人永樂中舉賢良方正不就放情山
水與其弟正暨吳下劉鴻中都湯允勸西蜀晏鐸四明王淮
山沈愚戚里王貞慶洞庭徐震淮南蔣忠爲景泰十才子詳見
明史文苑傳景泰六年慈谿張楷序云斯集選於西蜀晏侍御
序於嶺表陳亞卿見愛於潮閩都帥陳公彥章卽欲壽梓以傳
屬余爲序云云集版久燬四庫未著錄附存亦不之及道光
間其十五世從孫士本與兄士樞及同里王希一管庭芬徧爲
搜輯得二百餘首分爲三卷蔣生沐刻之此本惜闕九十兩卷

今以士本所輯者鈔附於後所失亦不甚多耳有四明盧氏抱經樓藏書印白隄錢聽默經眼兩印聽默吳下書估能辨別宋元舊版四明盧氏書辛酉劫中爲匪人搶賣於楊企棠家亂定陳魚門作緣仍歸抱經樓其書目中似不止一部余欲借鈔補足不可得也

竹巖先生文集十二卷 舊鈔本

四世從孫維騏編校

明柯潛撰潛字孟時號竹巖莆田人景泰辛未賜進士第一授翰林修撰歷右春坊右中允洗馬遷尙寶少卿陞詹事府少詹事兼翰林學士嘗於翰苑西築亭二間凡八楹又手植二柏李長沙館選受業於潛及李教習庶常以學士柏爲題一時作者倡和爲卷以貽其子藏焉千頃堂書目載竹巖集八卷 四庫著錄僅文一卷從莆陽文獻莆風清韻集錄詩十首文二首爲

補遺一卷並據集首董士宏序云原集在嘉靖時曾經刻版此
木卷一爲疏議序卷二三四五六亦爲序卷七爲記卷八爲傳
卷九爲墓表卷十爲碑銘卷十一爲誌銘卷十二爲說贊祭文
哀辭書題前題四世從孫維騏編校似爲嘉靖間刻本第董士
宏序不見耳

和梅花百詠一卷

舊鈔本

餘干魏克已撰

前有自序云予官憲幕多暇一日偶得臺中繡衣張光式之所
和梅花百詠詩詞極清麗其詩本以海棠馮公之題次以中峯
釋老之韻予不敢下筆然此心終不能已遂於宣德癸丑上巳
至八日而成題詠一依張公所定觀者尙冀正之前有宣德十
年浮梁孚安序已脫前葉但云張名楷字式之浙江慈谿人惜
未見張君之詩不能璧合耳

商文毅公集十卷

萬思刊本

後學漢陽劉體元編輯浦城徐一成校正庠生汪文慧周宗文六世孫商之相之彝同校

明商輅撰輅字宏載涪安人宣德乙卯解元正統乙丑會元殿試一甲一名累官少保吏部尙書謹身殿大學士贈太傅謚文毅當景泰易儲之議輅方以史館修撰入內閣輔機政名次第六輅毅然倡大義吐昌詞深明其不可議雖見格風槩凜凜英廟復位首召許以忠義有大用之意以忤石亨輩被誣廢者八年憲皇嗣統起召仍入輔政歷尙書學士晉少保引疾歸山閣不自耀生平述作其孫汝頤輯爲素庵文集數十卷兩燬於火僅存疏稿一卷李德候稱其詩雍容雅淡有陶韋風降慶間蒲安令蒲田劉應齡輯成刊爲六卷歲久版敝劉體元又重輯之自爲序邑合劉君捐俸梓行錢塘金學曾撰序而吳一賦又

書其後時萬厯壬寅癸卯間也

竹室內集一卷外集一卷

宏治刊本

王蓮涇藏書

徒道宗道義編次

釋淨倫撰淨倫號大巍本滇南昆明康氏子父泰母何氏宣德丁未誕生正統庚申出家天順癸未得法於浮山古庭堅公成化乙酉卓錫京都開創萬福禪刹宗風大著戊戌謝事退居種竹自怡號曰竹室癸卯登五臺壬子復歸竹室闕大藏經典旁通儒學所著偈頌士林莫不敬慕其徒道宗道義恐久而失遺相與掇拾成帙宏治九年賜進士第光祿寺少卿李紳爲序寫刊極精有太原叔子藏書記蓮涇汪魚亭藏問書諸印

王端毅公文集九卷

明刊本

明王恕撰恕字宗貫三原人正統戊辰進士官至吏部尙書明史有傳是書卷一記卷二序卷三書說題跋贊銘歲祭文誄卷

四子墓表卷六墓志銘卷七玩易意見卷八石渠意見卷九石渠意見拾遺補闕嘉靖壬子大梁李濂編而序之又有喬世甯序稱其文皆平實而不假雕繪焉

漫遊稿六卷

明嘉靖刊本

明馮世雍撰世雍字子和號三石江夏人嘉靖癸未進士直情高志倣儼不羣由北驗封主事改而南出守臨安地近外夷先之以教民夷感孚移徽州知府務在安全不求赫赫嘉靖丙申新安黃訓序云馮子有文集若干卷間出緒餘以示諸生劉丞時濟得而梓之同時知歙縣事李謹門人新安吳希中並爲跋千頃堂書目載漫遊稿又三石集均不著卷數殆傳本稀歟

王襄敏公集四卷

萬曆刊本

法梧門藏書

謹按四庫存目王襄敏集有二本同爲四卷一名越字世昌濬縣人官至兵部尚書諡襄敏此則王以旂撰也以旂字士招

江甯人正德辛未進士官至兵部尙書總督三邊著漚河奏議
其子備所編詩二卷文二卷皆功績之餘事也有翰林院印及
雲間存雅堂宏農氏珍藏又詩龜書書印詩裏求人龜中取友
我懷如何朱文諸印乃法梧門庶子式善家藏者也

椒丘文集三十四卷附一卷

嘉靖刊本

四明范氏藏書

後學南城圭峰羅玘校正知廣昌縣婺源余瑩訂刊後學同邑黃
選李喬編輯

明何喬新撰喬新字廷秀廣昌人爲前吏部尙書文淵第三子
景泰五年進士除刑部主事歷官副都御史南京刑部尙書卒
謚文肅遺稿爲羅圭峰所校廣昌令余宗器訪於其子承鳳而
梓之自有後跋嘉靖元年進賢舒芬序於前爲策府者三卷爲
史論者五卷爲奏議者三卷爲序記銘碑詩賦書簡題跋者二
十三卷附公之謚議傳贊銘碑又爲一卷有四明西郭范氏家

藏印

玉坡張先生黃花集三卷

正德刊本

汪魚亭藏書

玉坡居士張原著谿田居士馬理校正評點

原字士元三原人官兵科給事中卷首有右給事中張公小像
贊爲平川道人撰當出自藩邸之筆稱其穎敏絕俗名登高第
剴切過人職居要地不以一時之失竄炎荒而動心不以一時
之得復青瑣而樂意是曾登科目而後復職者千頃堂書目僅
載其黃花集蛩鳴集而無卷數不歸科分明詩綜且不及之罕
傳可知此本卷一下題甲戌十二月之乙亥八月卷二題乙亥
九月之丙子四月卷三題丙子五月之十二月僅三年中之詩
文前有正德十年癸亥佩蘭遷客書於貴陽之寄寄庵中自序
云余以罪謫新添道由沙漠經巴閬涉湘播慙賸剗夜郎之墟
履羅甸鬼方之域凡兩月始達間有餘適率爾成句兒維德侍

行兒卽錄之持帙請名猶憶昔居京師每夢黃菊花初不喻也
今茲驗於皇華之詩乎遂以黃花名之用紀其異云有汪魚亭
藏四書一印蛩鳴集則未見也

西崖先生擬古樂府二卷

萬曆刊本

王壽士藏書

方石謝鐸鳴治南屏潘辰時用評點門人彬陽何孟春音注

明李東陽撰東陽有懷麓堂集一百卷擬古樂府二卷在全集
中東陽有自序此爲何孟春音注謝氏鐸潘氏辰評點而明釋
祿宏刻本也前序云予少時讀書月塘菴友人同春江以西崖
先生撰古樂府僅半帙且詠且歎曰此古今絕唱也予後偶獲
全書寶而藏之恐遂淪沒乃重錄薄梓或曰子禪人是編非經
律論非尊宿注疏語錄文字是世諦中言也奚以刻爲噫子獨
不觀雪竇老人頌古乎識者品題謂頌古之聖今先生特未知
究心禪道與否假使參禪有悟時而出之一拈一評一偈一句

具見刀筆力斷案力擒縱殺活神奇變幻不思議力當必與雪
老馳騁上下可無傳乎哉有王金銘印湛廬二印

青溪漫藁二十四卷

正德刊本

明倪岳撰岳字舜咨錢塘人謙子天順甲申進士官至吏部尙
書謚文毅明史有傳此書前有倪文毅公小像馬文升閔珪二
贊正德甲戌長沙李東陽序曰青溪先生弱冠舉進士歷翰林
編修侍讀以至學士嘗修英廟實錄及憲宗文華大訓講讀經
幄及爲禮部侍郎進尙書加太子少保改南京吏兵二部參贊
留務入掌吏部如黜陟祠御異物謹天戒守舊章諸疏亦嘗攷
古義稽典故典極陳利害辭嚴理正深得古人告君之體至詞賦
碑表序記著述賦詠之作長篇大章泉涌山出情興逸發事理
兼備國朝父子入翰林爲學士並謚爲文實自倪氏始且以文
集繼世金華王忠文公之外不一再見亦於此著一代之盛云

稿舊爲嗣子中書舍人霽藏熊太守桂刻於徽州此本目錄後有夾行注云文毅倪公青谿漫稿詩文七十八卷講章奏議二十一卷南畿提學莆田黃公刊行二十四卷此本凡賦詩詩餘致語九卷經筵講章一卷奏議四卷頌表贊箴銘一卷記一卷序三卷書說題跋策問一卷碑及神道碑一卷墓表志銘二卷傳哀辭誄祭文一卷 四庫提要云史稱前後陳請百餘事今集中疏議共五十九篇與百餘事不合殆未見目錄後之夾注耳

康齋先生文集十二卷附錄一卷 宏治刊本

明吳與弼撰與弼字子傅崇仁人天順元年用石亨薦特敕召見授左春坊左諭德固辭不拜明史有傳與弼潛心理學欲盡削箋注詞章陳獻章胡居仁皆其弟子實開白沙餘干之宗世之詆譏者謂當授職賜對之際意必罄其平生所學有大議論

大建明聳動天聽復見二帝三皇之盛而所陳十事外覓無餘論然其辭榮卻貴浩然而歸峻節清風亦何可及詩則性所篤好宏治七年江浦吳泰守撫州從其子璵得遺文若干遂刊於邵齋自爲之序凡詩七卷文五卷冠以天順元年二年敕諭二道附錄薦章贈序行狀祭文卷端有寶研堂石雪居士吳與鼎氏三圖記 四庫著錄係崇禎壬申江南提學副使陳維新所刻實從此本出也

呂文懿公全集十二卷

嘉靖刊本 抱經樓藏書

後學王洪編輯曾孫科校刊

明呂原撰原字逢吉秀水人正統壬戌賜進士第二除翰林編修歷右春坊大學士轉通政司右參議仍入爲翰林院學士以母喪歸卒年四十五贈禮部右侍郎謚文懿南陽李賢撰神道碑程篈撰遺事豐城雷古和輯行實原著介菴集首五七言

古風一百十九篇引伸曲喻無殊講學近體有典有則音律渾厚文規法典謨無估倨之習公子太常卿九柏編其詩刻之曾孫曰科曰程曰穆以科甲克其家懼藏稿久彙詩文十二卷繡梓同郡鄭曉爲序四庫未見著錄育天都陳氏承雅圖籍練江陳昂之印東阜先生後人四明盧氏抱經樓藏書諸印

一峰先生文集十四卷

嘉靖刊本

明羅倫撰倫字彝正別號一峰吉之永豐人成化丙戌進士對策引程正公語人主一日之間接賢士大夫之時多親宦官富妾之時少執政欲節其下句倫不從直聲震於時奏名第一爲翰林修撰內閣大學士李賢遭喪去國朝廷留之倫詣其私第告以不可復上疏歷陳古今起復之非是且曰如其不然必準富弼故事終喪劉珙故事言事疏奏落職提舉泉州市舶司明年召復修撰改南京供職尋辭歸授徒日以注經爲業垂十年

卒於金牛山退居嘗欲仿古置義田以贍族遇乞人死於途輒解衣覆之客至留具館瓶粟罄借之旁舍始得舉火所爲詩文集宏治初邑令王昂刻之燬於火正德丙午仲子幹署江陰教官復刊未幾版毀嘉靖己酉臨桂張吉來宰永豐屬教諭延平林應芳蒐校捐梓吉與應芳同綴跋首列吉水羅洪先同邑聶豹二序并先生遺像正德十六年制誥陳獻章所撰傳此本有張氏午藏蔗林藏書二印

重校一峰先生集十卷

萬曆刊本 許醇大藏書

吉水後學鄒元標錄次德清後學吳期炤參訂

此本首載正德十六年制誥及遺像宏治癸丑陳獻章撰傳嘉靖己酉永豐聶豹吉水羅洪先兩序臨桂張吉一跋萬曆庚寅德清吳期炤宰先生故里距嘉靖己酉餘四十年集版蝕敗謀之南皋鄒先生重校又購得先生手錄夢稿計詩三百餘首合

策奏序記詩文爲十卷期炤自爲序并乞元標序於前 四庫
著錄者卽此也有許煊收藏个是醕夫手種田兩印

篁墩程先生文集九十三卷拾遺一卷 正德刊本

明程敏政撰敏政字克勤休甯人尙書襄毅公信之子年十歲
以神童薦召試聖節及瑞雪詩并經義各一篇援筆立就詔讀
書翰林院官給廩饌李東陽以女妻焉踰冠舉成化丙戌進士
一甲第二授編修歷官至詹事府少詹事宏治己未主會試給
事中劾其鬻題賣士敏政請廷辨得白再乞致仕而斥言者未
行而卒年五十五贈禮部尙書歿後聞事並自刑部主事鍾祥
沈文華抗疏伸雪士論歸焉著篁墩諸稿凡百有餘卷沒後七
年門人輩摘而刻於徽州名篁墩文粹論者以爲未盡其選正
德丁卯徽州知府何歆暨休甯知縣張九達王錯徵於其子錦
衣千戶壘得全稿而鏤梓之壘卽乞歆爲序而長沙李東陽撰

序冠於前門人祁門李汎序其後

龍舉文稿十九卷

嘉靖刊本 王蓮涇金星輯藏書

明陸簡撰簡字廉伯一字敬行號冶齋又號龍舉子武進人成化丙戌一甲第三名進士官至詹事府詹事兼翰林侍讀學士卒年五十有四贈禮部侍郎長沙李東陽撰簡墓誌云公所職纂述精確講說明暢校閱詳愼舉無遺力退而爲文緝密峻潔力迫古作而不輕應接有求之積歲卒不可得然所著已累百十卷蓋爲發情感物之作爲多有嘉靖元年門生華亭顧清序稱長沙誌墓云著述數十百卷當不下篋墩而先生屬纊時諸郎幼散落頗多收拾數年稍有倫序傳錄之間詩復逸去今所存者經延請義誠歸籍贊記序誌表等文而已定爲二十二卷今按止十九卷而各體已全豈刊時減併耶後有當塗祝鑾識又有王太原叔子藏書記金星輯藏書記擁書抵百城汪魚亭

藏閣書諸印

石淙詩稿十九卷 嘉靖孫氏刊本

門生北地李夢陽評點

明楊一清撰一清才情敏捷此本有詩無文首殿池稿次省墓稿禪後稿西巡稿北行稿容臺稿行臺稿歸田前稿自訟稿制府稿吏部稿玉堂稿歸田後稿督撫稿附簡札玉堂後稿各以類分止十九卷與明史藝文志載二十卷之數不合朱彝尊明詩綜稱其古詩原本韓蘇近體一似陳簡齋陸放翁李獻吉送昌穀詩云吾師崛起楊與李力挽元化迴千鈞初意楊非李敵不過爲師門耳及觀石淙詩實有高出李者乃知文士以千秋自命類不輕許人也自訟稿有自序熊桂跋督撫稿有門生段吳序尙有齊之鸞序及玉堂後稿方鵬序此本均佚

鮑翁家藏集七十七卷

正德刊本 聖雨樓查氏藏書

明吳寬撰寬字原博長洲人成化壬辰會試廷試俱第一累遷至掌詹事禮部尙書司內閣誥敕宏治十七年卒於位年七十
三贈太子太保謚文定爲諸生時徧讀左氏班書唐宋大家之
文欲棄舉業從事古學都使者迫促乃就鎖院經明行修粹然
篤實性好蘇學書亦酷類詩則深厚醲郁脫去凡近而古意獨
存文則典而不俗絕而能約諸理義以成一家之言所藏書籍
多出手鈔以私印記之前輩風流洵不可及家藏集手自編定
歿後其子中書舍人爽刻梓於家正德三年王鏊李東陽爲前
序徐原爲後序有聽雨樓查氏有圻珍賞圖書滄遠堂圖書慶
賀諸印

馬東田漫稿六卷

嘉靖刊本

東田馬中錫著沙溪孫緒評筆山文三畏校

中錫字天祿故城人成化甲午省試第一乙未舉進士授刑部

給事中疏劾萬昭德之弟瀕死不悔武廟初起遼東召爲兵部
侍郎劾罷瑾黨冒邊功傳陞者瑾恨之矯詔改南京工部尋罷
官瑾黨誅起撫大同流賊鈔掠山東河北召爲右都御史往督
軍事陞左都御史掌院事以老師玩寇下獄踰年卒御史盧雍
追疏其冤于祭一壇明史有傳集爲其子師言所編同邑孫緒
序云詩格在計渾劉長卿陸龜蒙之間 四庫提要謂其出入
於劔南集中洵爲允論天一閣書目載此書尙有開州王崇慶
一序此本佚又有文稿五卷亦未見前有崑山徐氏家藏健菴
乾學之印似係書估僞爲

震澤先生集三十六卷

嘉靖刊本

明王鏊撰鏊字濟之吳縣人成化乙未進士第三人及第歷官
吏部右侍郎正德元年入閣進戶部尙書文淵閣大學士加少
傅改武英四年致仕卒年七十五諡文恪鏊深於經學冠冕南

宮困於逆瑾在內閣朱久著震澤稿文以修潔爲工規摹韓王
頗有矩法詩不專法唐人在北宋梅聖俞南宋范至能之間集
爲元孫永熙等所梓嘉靖十五年南海霍輅爲序

昇素詩集十四卷 嘉靖刊本

明林俊撰俊字待用號見素莆田人成化戊戌進士官至刑部
尚書謚貞肅明史有傳俊有見素文集二十八卷奏疏七卷續
集十二卷著錄 四庫提要稱俊原有詩集十四卷此本無
之觀其孫題跋云重梓是書而詩集尙闕是當時本未同刊
故流傳頗難黃氏十稕堂書目尙載其爲卷十四也按天一閣
書目亦載其書前有石淙楊一清北郡李夢陽序此本李序已
闕後有正德己卯無錫邵寶序云先生夙好吟詠大篇短章傳
播海內初以秋官郎言事左遷久而長憲湖南以疾歸隱數年
起位南臺未幾還湖江西又數年起靖蜀寇功成乃老其間四

十年所至有詩其時輿地皆可攷集凡十四卷刻於公伯子建同年東莞彭君美中西蜀高君次少傅憲菴楊公既爲之序而公之甥太倉知州黃君廷實復屬寶序言於後其文若干卷別有刻者茲不著按楊石淙評其詩曰詩宗唐杜晚乃出入黃山谷陳無已間初視之若有隱澀語久而咀嚼悠然有餘味焉嘉靖壬申鄒山齋輯公之詩族姪有年捐俸重梓自爲一跋列楊一清邵寶二序而無李夢陽序與此合

虛齋蔡先生文集五卷

正德刊本

明蔡清撰清字介夫晉江人成化甲辰進士歷官南京國子監祭酒卒贈禮部侍郎萬曆中詔特祀於鄉追謚文莊正德辛巳葛志貞輯其集爲五卷見素林俊序云虛齋平生精力盡用之易四書蒙引之間梓學宮而行天下矣至其經義趣深理到論策諸作暢達疏爽詩文別出體格掖人心而繫名教卒澤於仁

義道德粹如也其後版刻漫漶族孫廷魁復爲重刊益以補遺
附錄增爲八卷 四庫以所增無關輕重仍以原編著錄此本
應刷在前尙堪卒讀

容春堂全集六十六卷

嘉靖刊本

明邵寶撰寶舉南畿受知西涯爲戶部始受業門下西涯以衣
鉢期之越三十年西涯貽以信難一篇以歐公之知子瞻子瞻
之服歐公者爲比蓋西涯絕筆也西涯沒李何之焰大張而公
獨守師法確然不變 四庫著錄全集二十卷後集十四卷續
集十八卷別集九卷此本前集二十卷正德中震澤王鏊同邑
浦瑾爲前序莆田林俊爲後序寶又自序卷二十一一起接別集
九卷卷三十至卷六十六不分後續二集較分四集本多五卷
末有嘉靖甲午歲慎獨齋刊行木記按千頃堂書目四集之外
多勿藥集十四卷豈此本爲初編未分之帙歟

翰林羅圭峯先生文集十八卷續集十五卷

嘉靖刊本

建昌府同知內江余載仕重刊南城縣學訓導香山鄭棐校正

明羅玘撰玘字景鳴南城人成化丁未進士歷南京太常少卿
吏部右侍郎贈禮部尚書謚文肅明史入文苑傳在詞林時以
氣節自恃其乞定宗社大計二疏與上李東陽書皆言人之不
敢言以是忤時宰歸甯庶人卑詞致餽走避山中病革聞南昌
之變移書討賊投筆而絕其集初刻盱胎再刻南監及武進孫
氏而荊州祇刊六卷嘉靖五年陳洪謨按盱荆本之外命郡官
從其子姪復得續集二卷奏疏一卷並登諸本自爲序同時夏
良勝爲後序卽此本也 四庫著錄之三十卷本又在其後矣

吳文肅公摘稿四卷

明鈔本

同邑王升晉陵莊煦姪孫達可校選

明吳儼撰儼字克溫宜興人成化丁未進士歷官待講學士正

藏書志卷三十六

三

德初逆瑾竊柄流毒指紳儼主順天鄉試以爲臣不易命題乃出危言懼之不爲動因其家富復陰遣人啗以美官仍拒之瑾怒出中旨罷其官瑾誅復召用終南京禮部尙書謚文肅儼文章莊重簡古詩詞清麗可諷集始於萬厯甲申年其孫士遇刊版王升章煦及其仲孫達可編存故稱摘稿詩文各二卷前有萬厯甲申禮部尙書致仕萬士和序後有王升與達可跋此帙首蓋翰林院印並有鈞勒塗乙之筆乃館臣編四庫書底本也

大崖李先生詩集十二卷文集八卷附錄一卷

明刊本

嘉魚李承箕世卿

承箕嘉魚人幼有大志不事舉業讀書大崖山成化庚子鄉試考官桑悅首選其卷監臨不從悅上書政府論薦丙午領鄉舉一試禮闈而歸徒步往師陳獻章於嶺南兄承芳以大理評事

謝病歸築釣臺於黃公山奉母講學賦詩兄弟自相師友承芳
有東喬集行世承箕爲詩文下筆立就若不經意者集乃東湖
子吳廷舉所刊並自爲序又有宏治庚申增城洪雨題上海陸
深序後爲附錄一卷則其孫寶蒙所錄墓表行狀及陳獻章所
贈詩文也

大保費文憲公摘稿二十卷

嘉靖刊本

明費宏撰宏字子充鉛山人成化丁未進士廷試第一人年才
十九領鄉薦年才十六正德六年以禮部尙書直文淵閣九年
致仕嘉靖初召還旋致仕十四年再召進華蓋殿大學士卒年
六十八贈太保諡文憲武廟時逆瑾竊柄凌轢公卿宏獨骯髒
不爲意又以守正拒留庶人事詳明史本傳世廟再起枋政上
暇輒與討論詩詞輒命和御製詩賜有睠茲忠良副倚賴未讓
前賢專令名之句杜夢深忌之疏言詩詞小技猥勞聖躬且使

宏窺意指竊恩遇以凌朝士假結以救過上覽之弗爲動是書爲詩四百五首爲文四百十篇伯子懋賢所錄仲子懋良孫延之所校巡按江西侍御吳遵所刻嘉靖乙卯禮部尙書武英殿大學士門人華亭徐階序 四庫不著錄千頃堂書目載有鍾石先生文集二十四卷又有慚漫錄不注卷數文瑞樓書目則稱鵝湖摘稿二十卷始未刊以前之名也

馬端肅公約齋詩集一卷

萬曆刊本

金星報吳璠川藏書

明左柱國太師吏部尙書鈞陽馬文升著陝西按察使後學徐衍祚編輯

文升字負圖鈞州人景泰辛未進士宏治十四年拜吏部尙書加少師太子太師謚端肅明史有傳公之勲勞首在西征石城撫按東夷興復哈密國立朝五十餘年值事變臨利害屹然如山不可搖奪爲太監汪直王端所誣寃俱得白正德中告歸屏

居三峰山董村之別墅更號三峰居士扁其堂曰樂農集爲萬
歷庚寅元孫懋梓傳吳郡毛在爲序何淳之爲跋凡古今詩詞
三百四十首攬山川夷險之形勝酬縉紳交遊之贈答懷君父
生成之大德感古今興替之異宜莫不發於篇什矣按端肅奏
議著錄於四庫三紀附列於存目而詩編當時失進其罕見
可知此本有文瑞樓金星軹藏書記結社溪山此中有真意文
瑞樓主人璜川吳氏收藏圖書文昭借觀諸印

西村集八卷

舊鈔本

汪魚亭藏書

明史鑑撰鑑字明古吳江人學者稱西村先生自少受知於徐
武功與吳文定沈啟南爲友於書無所不讀尤攻史學於古今
治亂之端官府政事名物數記縱橫上下指掌論說咸中肯綮
而不屑以求一試成化中王恕巡撫江南問以百姓利病歷歷
語陳復疏上其事恕歎爲才可以當一面其著述有關政事者

居三之一而尤詳於吳中水利至桂彥良姚善呂震尹昌隆平
思忠五傳更足補史乘之遺宏治丙辰卒年六十三家孫進士
臣輯是集提督南贛汀漳等處軍務都察院右副都御史邑人
周用爲序嘉靖八年曾孫璧壽諸梓兵部職方郎中郡人盧襄
又序而以吳寬撰墓表贈詩附之今四庫著錄者是也後有
汪魚亭藏閱書一印

西村先生集二十八卷

舊鈔本

松陵史鑑明古父著耳孫冊編輯

是編前列盧襄周用兩傳序次列浦國監察御史劉鳳序稱先
生從孫北斗字北河者每言及先生則知明古之有後今北河
出而鐫之若玉在櫝其光發聞能竟掩乎又萬曆三十一年吳
邑徐應雷序稱先生從孫曰辰伯者哀先生已梓未梓集屬采
擇而序之舊有序予讀之則先生有孫曰臣登進士官少參而

余白幼知先生不知少參也辰伯孝友好古雋才閎藻將於是焉在是辰伯卽兆斗也而此全目題六世孫冊彙輯八世孫在楷珍藏九世孫編年鱗重校卷一賦卷二五古卷三古樂府卷四七言歌行卷五五律卷六五排卷七五絕卷八六絕卷九七律卷十七排卷十一七絕卷十二聯句卷十三詞卷十四傳卷十五誄卷十六祭文卷十七行狀卷十八墓誌銘卷十九墓表卷二十蓋石文卷二十一序卷二十二尺牘卷二十三記卷二十四劄子卷二十五志卷二十六贊卷二十七跋考卷二十八喻議字祠對銘附錄吳文定墓表諸名公挽詩目錄後有徐渭仁記云 四庫著錄者八卷提要云鑑集初爲陳繼儒所選凡二十八卷舊藏徐欽家見王士禎池北偶談今其原本已不可得見矣今此本正是陳眉公選定二十八卷徐虹亭太史之印記前後俱存蓋卽池北偶談所載 四庫未見之本也今從而

鈔之

西軒效唐集十二卷

正統刊本

金星韜藏書

明丁養浩撰養浩字師孟別號西軒仁和人家博陸成化丁酉領鄉薦丁未第進士選行人遷御史差按貴陽再按南畿遷福建按察副使擢雲南布政使是集詩八卷文四卷其名效唐者蓋取法唐人之意也千頃堂書目祇載其集名而不著卷數殆未見耳此本前有宏治辛酉提督學校福建按察副使安成劉丙序卷首有金星韜藏書記一印

楊文獻公集三十卷

宏治刊本

明楊守陳撰守陳字維新號鏡川鄞縣人景泰二年進士成化初進侍讀學士同修宋元通鑑綱目孝宗嗣位執政擬遷南吏部右侍郎帝舉筆去南字充憲宗實錄副總裁卒贈禮部尙書謚文懿守陳博學多職於書無所不讀爲文下筆立成詞極閑

博而卒澤於理宏治十二年弟守陞序曰遺稿浩穰未能悉傳
昔在京邸妄意掇取議論敘事雜著爲三十卷付公之季子茂
仁先爲刻本卷一爲晉庵稿二至五爲鏡川稿六至十五爲東
觀稿十六至二十爲杜坊稿二十一至二十九爲金波稿三十
爲銓部稿天順元年自有序成化二十年用江何喬新安治二
年新安程敏政並爲序之詩集付長子茂元圖續刻未遂此本
未進 四庫諸家書目亦罕觀有存雅樓宏農氏珍藏印

碧川文選四卷

嘉靖刊本

明楊守陞撰守陞字惟立號碧川鄞縣人守陳之弟成化戊戌
進士官至南京吏部左侍郎加尙書銜致仕事蹟附見明史楊
守陳傳此本前有正德三年筵翁七十三歲自序云吾家世居
鏡川之陽碧川之陰二川分流復合於一以達郡城日月二湖
吾兄文懿公旣號鏡川而命余爲碧川文字多不存稿其僅存

者編修時有玉堂初稿兩京侍讀時有華省南北稿爲諭德時有東寮拙稿爲學士時有北門漫稿遷祿南京吏侍恐衰年怠於進修扁其齋曰乾乾比以足疾乞骸家陞尙書致仕歸老月湖作蹇蹇庵以自命病間檢閱舊稿藏之家塾嘉靖乙酉外孫陸釗識云公原集諸稿總一千四百餘篇粹者一百五十三篇皆公晚年自選蓋十之一也故名碧川文選而以舊序冠於首並乞南京兵部右侍郎莆田陳琳爲序

草窓梅花集句三卷附錄一卷和梅花百詠二卷

宏治刊本

蘭溪章流楚端集稿

號宇廷瑞臨溪人家治庚戌進士授刑部主事遷工部郎中六十歲後復章姓此稿前有乙未仲冬自序云宏治戊午冬屠命來西川督修申王府第公署西有梅數株方盛開一見如平生徜徉其下不忍去自惟愛梅興味不減古人用是借古人之句

寫吾心之趣日復一日得五七言近體三百餘篇題曰草窻梅花集句云敘州守吳惟謙刊版以傳新都楊廷和汝南沙壁爲前後序後馬湖同知秦和廖森復正其譌又爲序卽此本也琥歸田以後值正德丙寅病中取中峰和海粟百詠詩韻更和百律復取馮海粟百詠舊題仍和百篇因舊題青梅黃梅臘梅皆實也禹梁梅材也易以補梅露梅雨梅驛館梅詠之自序之外正德三年鄭璫四年從兄慎齋品並爲序

草窗梅花集句五卷

崇禎刊本

蘭溪童琥瑞輯著新安洪九疇非勇輯補同社程起駿同集

琥集五言八句百首七言八句百首七言四句百首附錄紅梅七言八句十首皆注原詩姓名是書一刻於宏治版已漫漶汪子原又爲刻之洪九疇復集五言絕句一百首以補未備並訂其譌正其複洵稱愈進愈工矣崇禎壬午九疇序云憶戊己間

作客杭之冬官行署中有芙蓉石與官梅皆宋德壽宮物刻刻
冥參僨賞其下主人程君衡恐梅花冷落公餘命酒賦詩若吳
子巽之汪子伯鵬子厚兩高足暨主人令子伯敷及余友程子
逸倩迭進更酬可謂盛事戊辰之秋颶風大作數百年官梅五
幹旋摧其四君衡先生慮後來者不獲覩其全屢命繪之終難
形似程起駿與許楚均有序按今之梅花碑乃藍瑛孫杖所繪
乾隆中屢蒙 御題芙蓉石經大吏進呈 禁苑 錫名青蓮
朵庚辛劫後止留碑刻微此集此敘無從知其故事書貴兼蓄
信哉

祝氏集略三十卷

嘉靖刊本

明祝允明撰允明字希哲右手枝指自號枝指生長洲人參政
顯之孫五歲能作徑尺字九歲能詩宏治壬子舉於鄉主司王
文恪手其卷曰必祝某也既而自喜以爲能知進試禮部不第

除興寧知縣遷應天府判自免歸卒年六十七子續檢輯手稿
多塗抹改注他人不能識歷官自攜時復緒正力不任梓遲徊
卅年嘉靖戊午眉山張公景賢撫吳以其祖與續同登第更從
其子繁索稿梓行自爲撰序後有祝繁識後一二卷騷賦三四
卷樂府古調五卷歌行六七八卷近體九卷古體箴銘十十一
卷論議十二二十三卷書牘十四卷碑版十五至二十卷傳誌二
十一至二十九卷紀敘三十卷外教有胥山柴世堂涉獵一過
家在西湖十二橋蔡宗仁印仲安一字春江諸印

空同先生集六十六卷

萬歷刊本

李伯甫藏書

北郡李夢陽撰

夢陽字天賜更字獻吉慶陽人徙扶溝宏治癸丑進士授戶部
主事轉員外郎應詔陳言彈壽甯侯張鶴齡繫錦衣獄旋釋之
進郎中代尙書韓文草奏劾劉瑾坐姦黨致仕起江西提學副

使恃氣陵幪臺長許奏罷官宿庶人既誅坐爲庶人撰陽春書
院記獄辭連及尙書林俊力持得免卒後弟子私謚文毅天啟
初追謚景文夢陽倡言復古使天下毋讀唐以後書持論甚高
學者翕然從之而臺閣雍容之作久而流爲曄緩冗沓之音未
嘗不賴之一振而譏其摹擬剽竊者亦因之而叢究之詩才富
有亦不能掩其長也詩三十六卷文三十卷有宛陵李之郇所
藏書一印

何燕泉詩集四卷

隆慶刊本 汪魚亭藏書

邯鄲燕泉何夢春著同郡後學周南全湘後學蔣文化輯

夢春字子元號燕泉邯州人宏治癸丑進士授兵部職方司主
事歷郎中出補河南參政入爲太僕卿以僉都御史巡撫雲南
召爲吏部右侍郎世廟卽位詔議尊親禮大臣相繼去位孟春
率部院臺諫力爭泣諫於左順門上疏上撫諭再四跪泣不起

左遷南京工部右侍郎無何盡斥諸咈議者削籍不復用屏居
著述有餘冬錄及文集十八卷穆廟初追贈禮部尚書諡文簡
是集有隆慶丁卯廣東按察副使鄉後學劉穩序云臺山蔣公
當路委署郴篆暇取先生文集讀之喟然歎曰茲一方文獻也
何湮沒若是遂輯集中所載古選近體詩四卷相俸屬先生子
壻國子生喻子成刻之有汪魚亭藏閱書一印

息園存稿十四卷

嘉靖刊本

姑蘇顧璘

璘字華玉先世吳縣人徙南京宏治丙辰進士知廣平縣徵入
爲南京吏部主事遷開封府降知全州起知台州府累遷浙江
布政使擢右副都御史巡撫江西乞終養忤旨勒致仕再起巡
撫湖廣顯陵工竣加工部尚書還朝改南京刑部尚書有浮湘
山中憑几集及續集文集緩慟諸集此息園存稿嘉靖戊戌湖

廣漢陽同知陳大壯爲序乃當時專刻者也明史文苑傳稱璘初與同里陳沂王韋號金陵三傑後寶應朱應登繼起號四大家

邊華泉集八卷

嘉靖刊本

葉石君顧俠君藏書

明邊貢撰貢字廷實號華泉厯城人宏治丙辰進士授太常博士擢戶部科給事中出知衛輝府改荊州陞山西河南提學副使嘉靖初召爲南京太常少卿遷太僕改太常卿拜南京戶部尙書卒年五十七與李夢陽何景明康海王九思徐禎卿王廷相稱宏治七子又與李何徐稱四傑此本前有大名郎魏允孚撰序云先生集舊有本歲久而蝕又遺所爲文不載余理濟之明年從先生仲子搜得數十篇因敘入集中爲重鋟之此本惟詩八卷文集六卷闕按四庫提要云文集亦魏允孚所續刊自明以來談藝家置而不論今核其品格實遠遜於有韻之詞

豈是詩於未續刻文集時先爲印行歟有葉氏藏書印當是石
君圖記更有顧嗣立印俠君秀野草堂顧氏藏書印李伯雨印
諸圖記

陽明先生文粹十一卷

嘉靖刊本

潘叔潤藏書

明王守仁撰文成有陽明文錄二十卷文錄別集八卷又續錄
八卷又陽明全書三十八卷又居夷集三卷又陽明寓廬遺稿
二卷又陽明文選八卷與此文粹皆著錄於千頃堂書目是書
十一卷一卷雜著十三篇二至六卷答書七卷雜著八卷詩九
至十一卷爲傳習錄嘉靖癸丑廬陵宋儀望刻於河東書院自
爲序屬下錢塘後學姚良弼跋稱代巡宋公按歷河東講明正
學慮諸士不能徧識也刊先生文集慮諸士不能知要也擇先
生序大學古本大學問諸篇及傳習錄答諸君子論學諸篇訂
爲四本名曰文粹示良弼校刊焉有趙氏鑑藏潘介祉印玉荀

潘叔潤圖書記諸印

陽明先生別錄十卷

嘉靖刊本

後學新安胡宗憲重刻門人錢德洪王畿編次唐堯臣校正

明王守仁撰卷一至卷七奏疏卷八至十公移後有嘉靖三十七年門人唐堯臣識云歲丁亥十月先生有兩粵之命過吾南昌與諸生講學旬有一日維時幕下文武憂譏畏譏從先生行日以再四先生微哂之明日解維章水未抵劔江而粵西捷書至矣夫然後信先生良知默運於無形頃年倭夷溷海督府胡公肅將錫命提三尺劔以臨指東南堯臣以職事奔承左右第見案頭惟此集與鼓枹具存推其端緒則固有以然則君臣大義華夷大防迨正大儀日中論而不置者夫豈偶然哉識公重刻之意不獨爲文教而已又有門人一跋名已蛀損前有乾隆癸巳三月二日北平翁方綱識云陽明先生別錄十卷嘉靖三

十七年刻本有雲間沈白手評白字賁園華亭人繹堂先生弟
善山水世但知繹堂以書名而不知賁園書之工如此況其詩
事懷賢附此集以傳其可寶更何如注黃字者陶菴先生也有
翁方綱印次葉又題曰庚申是康熙十九年冰蚪蓋賁園別號
又題曰沈賁園行草居然平坐位葉今日題文成疏稿墨迹及
之丙午七月十四日因此集卷首賁園書眉標題有庚申夏月
日望字故翁跋及之也有雲間沈白印又文淵閣直閣事曰講
官掌詹事翁方綱印

杭雙溪先生詩集八卷

嘉靖刊本

荆溪杭淮東卿父著

淮宜興人宏治乙未進士累官南京總督糧儲右副都御史乃
宏治癸丑進士布政使濟之弟二難競爽同負盛名與李夢陽
徐禎卿王守仁陸深諸人相唱和詩則嚴整雅健格高意正音

節舒越有前代作者之風五言可亞鄭少谷集有嘉靖乙未晉江王慎中序及林東海跋又有敦柔齋小印

柏齋文集十卷

明刊本

汪季青藏書

明何瑋撰瑋字粹夫懷慶衛人宏治壬戌進士歷官禮部右侍郎篤行勵志以格致爲宗兼明禮儀樂律當時東南學者多宗王氏良知之說而瑋獨以躬仁爲本不以講學自明其均徭均糧論兵諸篇切中時弊尤非空言詩特其餘事耳然如九日和韻實從肺腑中流出也鄭世子載堦爲其外甥受其律數之學嘉靖己酉刊其文十卷詩一卷四庫著錄者是也此本詩卽編爲第十卷前後無序跋版心上下黑口惟於每葉前版匡外標小字柏齋文集卷數葉數或刊在鄭本之先有摘藻堂藏書印平陽季子收藏圖書休甯汪季青家藏書籍諸圖記

竹澗先生文集八卷奏議四卷附錄一卷

嘉靖刊本

明潘希曾撰希曾字仲魯金華人宏治壬戌進士授兵科給事中抗疏忤逆瑾遣往湖廣計處邊儲復命下獄拜杖除名爲民瑾誅復官歷陞工部侍郎治河有功改兵部贈尚書卒年五十七程文德撰傳云公儀狀秀偉言辭辨正平生讀書精思力究發爲文章雋腴古雅詩尤清婉卓然名家其子徽乞吳郡黃省曾校刻以傳屬東郡蘇祐江陰張袞爲序本傳墓銘附於後

洄詞十二卷

趙府刊本

相臺桂銑仲冕著

銑字仲冕號子鍾安陽人宏治乙丑進士官至南京禮部侍郎謚文敬明史有傳銑家境有洄水集因以名一二卷爲館集三卷爲退集四卷爲雍集五至十卷爲休集十一十二卷爲三仕集每集下皆編排年次不分體裁集中排陽明之談良知劾張桂之議大禮皆著風節政議十篇準酌古今不務迂談漫記十

藏書志卷三十六

三

條足裨宋史餘論亦歸於正此本前後無序跋或爲書賈裁割
歟版心有趙府味經堂五字

周恭肅公集十六卷

明嘉靖刊本

明周用撰用字行之吳江人宏治壬戌進士歷官吏部尙書卒
贈太子太保謚恭肅歷官四十餘年忠勤恪碩自喜爲詩動盈
卷帙書法俊逸尤善繪事詩詞十卷記序雜著祭文碑銘墓表
誌銘壙記行狀凡四卷奏疏二卷

右別集類十四